

JESUS CHRISTO NIYA TAWA-MANI
MATTHEW TSIDYATRANI

- 1 ABRAHAM ga-iatra David ga-iatra Jesus Christo gowa tsiianishi dyika tsidyatrani.
- 2 Abraham Isaac iatraku; e Isaac Jacob iatraku; e Jacob Judah, e Judah ga-tyumutyaimishi ga-iatrakutya;
- 3 e Judah, Tamar kuitsa dyika si, Perez e Zera iatrakutya;
- 4 e Perez Esrom iatraku; e Esrom Aram iatraku; e Aram Aminadab iatraku; e Aminadab Naasson iatraku;
- 5 e Naasson Salmon iatraku; e Salmon, Rahab kuitsa dyika si, Boas iatraku; e Boas, Ruth kuitsa dyika si,
- 6 Obed iatraku; e Obed Jesse iatraku; e Jesse David rai tseshi iatraku; e rai tseshi David, Urias ga-okui tseshi
- 7 dyika si, Solomon iatraku; e Solomon Rehoboam iatraku; e Rehoboam Abia iatraku; e Abia Asa iatraku;
- 8 e Asa Jehoshaphat iatraku; e Jehoshaphat Joram iatraku; e Joram Uzziah iatraku; e Uzziah Jotham
- 9 iatraku; e Jotham Ahaz iatraku; e Ahaz Hezekiah iatraku; e Hezekiah Manasseh iatraku; e Manasseh
- 10 Amon iatraku; e Amon Josiah iatraku; e Josiah Jechoniah e Jechoniah ga-tyumutyaimishi iatrakutya ni
- 12 Babylon ye tsayatrutseyi. Babylon ye tsayatrutseyi si yuku, Jechoniah Shealtiel iatraku; e Shealtiel Zorobabel iatraku; e Zorobabel Abiud iatraku; e Abiud Eliakim iatraku; e Eliakim Azor iatraku; e Azor Sadoc iatraku; e Sadoc Achim iatraku; e Achim Eliud iatraku;
- 15 e Eliud Eleazar iatraku; e Eleazar Matthan iatraku;
- 16 e Matthan Jacob iatraku; e Jacob Mary ga-atru Joseph iatraku. Mary dyika si Jesus tyia. Wa Christo tsaaniatyishi.
- 17 She shrue sayu shitaatyumishi, Abraham si yuku David hema katsi tyana tsitra tyaatyumishi, e David si yuku Babylon ye tsayatrutseyi hema, katsi tyana tsitra

tyaatumishi, e Babylon ye tsayatrutseyi si yuku Christo hema katsi tyana tsitra tyaatumishi.

- 18 Mu taa tsa Jesus Christo tsiianishi: Ga-naia Mary, Joseph dyika taayaanityi, tsa na kuutsikumishi, Kukimuni Maiani dyika si tyikuunishi tyiemi chaetra.
- 19 She ga-atru Joseph, tawa hatrutsai ta, tsatsi Mary ga-nunani nitratyuu, makuma ai si yuku nikuyatyu chutsityishita. Taa kautsityishitani, Mu! hitseshi niya Kaunamatsi Huchani ga-upeseyi tyiemi tyiutrani tyanata: Joseph, David ga-mutyi, bashrumi tyiutyushu kutra-okui Mary ushutsani, she tsikuunishi wa Kukimuni Maiani dyika si tsa. Shrue wa mutye tsa noiasetyuku e nuishratrashru Jesus, she emi ga-hanotyaimishi ga-ukitsishetyishi si neyatraguku. Shrue towa sai tsi e-kaetra, emi heya Kaunamatsi Huchani prophet niya e-katsanishi e-naitraku, tyanata:
- 23 Imi me! Tu na maku-tsa n'kuutyu e mutye tsa noiasetyuku, e neyeshratanatsaumasa Emanuel, towa E-hashhi tyarapatyi tsiutrani Iusi sutruwataa tsa.
- 24 Shrue tyitrachuwa e emi Kaunamatsi Huchani ga-upeseyitanishi tsiyanikuiyanishi me e tyitra, e gaokui tyushutsa. She mi ga-mutyi ku-iasetyuma hema, tsatsi tyupakatsanu. She E-gashi JESUS tyishratra.
- 2 She e shru, Jesus ai Judea Bethlehem tsiaa ni, Herod emi e rai tsaa ni, Magoi tsaitrunimishi hatrutsai ha ni si Jerusalem hau tyeetyu, tyana: Hatyi ga Horiyu dyika tsiianishi Rai? She wa ai ha ni si ga-shityita siukachana, e hau emi amoma sitraneyee emi heya tuwe sutyeeeku. She rai tseshi Herod towa kaka ni, gowatyiuura e Jerusalem dyu sai hano gowa-shitawautra.
- 4 Shrue ai dyu sai heme chayani e tsidyatranikusana tsayawatyami, tyiwapeta hatyi Christo niiatyu. E tania; Ai Judea dyu Bethlehem; taa she prophet niya tyidyatrani:
- 6 Juda hatsi dyu Bethlehem, Juda ga-uchani kotaa tsatsi hishrome mame drushinishi kutanu, she

kutyeshi si sa-hanotyaimishi Israel nyeyawaatsi-kunishi Huchani niuumuku.

- 7 Shrue Herod makuma Magoi tyiwapeotsani chityi
- 8 chaautyu hamatsa shityita tyiukachana. E Bethlehem ye tyayata e e-chatsa: Tyeeekuma, e chityi owaka niya tsi niyaipanakutrusa, shrue shiyainawatyano, hawe si niupbenatyumasa emi heya nutyu mu hake hau amoma nitranyesi. Shrue rai kukanatyi ai si yuku tyeeeku, e Mu! wa ai ha ni tyiukachanatyishi shityita yuku yani chayatyuinai chityi hau hema owaka gaapishra dinya si chutyatsi. E shityita kuukachanatyia ni mame ma ima tyiwauishityia. E katrutya ye hake tyiepu e owaka tyiukachana, ganaia Mary ishikawa, e chaashitotrume e hau amoma tyitrana, e ayaachani gowaushiputawatya tyiwayaityanimityi, uru, anye bushrutyani tsimasha, e tsityumi uipushrutsi. E hitseshi niya Iusi tyiwapanatsa tsatsi Herod gaapishra ye si utsutsi, ishika dyika hiyani ye wa si ga-hatsityishra ye si tyeeeku.
- 13 She ai si yuku tyeeekuma, Mu! Kaunamatsi Huchani ga-upeseyi hitseshi niya Joseph tyukacha tyanata: Ipatyu, owaka e ga-naia paayutse e Egypt ye traapayu, e ai ni-shru mi hama tsika na si shraupbenu, she Herod owaka niyumutyutsaku ni niyaipaku. E tsiipatyu e owaka e ga-naia gapushu ni tyaayutse Egypt ye wa tsutyu. Shrue Herod kushityi hema ai tya, emi heya Huchani prophet niya e-katsanishi e naitraku, tyanata: Egypt si sa-mutyi si-upbeotsa.
- 16 Shrue Herod kautyukunu Magoi tsiuitutranatyishi, mame chutsayawa, e tyayata, Bethlehem nu e Bethlehem shra tsetyau dyu, hemakuma Magoi si kaautyumishi tsaashityi, sai dyu kushraityi ku nutsishu tseepishi mutye-tsa iatra chuwa. She chaimatsitratya prophet tseshi Jeremiah niya tyetsani tyanatani:
- 18 Rama dyu hau katsanishi takani, katyikuiyani e mame ayamakuni, Rachel ga-iatra niya katyikuiya, e tsatsi na tseemishi niya, tsatsi hushutsamaye.

- 19 Shrue Herod kushitoni, Mu! Kaunamatsi Huchani ga-upeseyi hitseshi niya Joseph Egypt dyu tyukacha,
- 20 tyanata: Ipatyu, e iatra e ga-naia paayutse e Israel ga-hatsi ye ima, she iatra ga-iani tsiyaipatyikuiya-
- 21 natyishi kaawi. She dyu tyiipatyu, e iatra e ga-naia
- 22 tyaayutse e Israel ga-hatsi hawe wa si tsutyu. Shrue kakani Archelaus ai Judea dyika dyu huchani tyityitanu ga-naishityia Herod cha-hamashu, chuputsa hake uatsini, e hitseshi niya Iusi tyiupanatsa ni, Galilee
- 23 ga-hatsi hatyi ye wa tsutyu, e Nazareth tsaashityitra hau tsaatsi e ai chukuiya, emi heya prophet niya tsatsanishi e-naitrakuni Nazareth-me niyenimasatsaumasatyishi.
- 3 Shrue wemakuma tsaashityiatani hawe tsutyu baptisma tsayatyita John Judea ga-hatsi tsatyau ye chukatseta, e-chatsa: Kaunamatsi itye-tshesra hawe ena
- 2 kaetyita, emi heya chuwataipunaima. She towa emi tsa prophet tseshi Isaiiah niya tsaatsanikuiyanishi tyanatani, Tsatyau hatsi ye kokatsetatyisu katsanishi, Huchani ga-hiyani haku piutranita, tsayatyimishi shitutsi peyatyitranita.
- 4 Towa John gameyu hadrani niya chawakuni, e eshraka ga-isha shriena chaatyashityu, e chaupbewi tsiika e tsatyau-me tsishityini. She, Jerusalem-metra e sai Judea dyu-me e Jordan chuna ai shriena tsatyau-metra
- 5 sai haupa hawe tyiwatseeku, e ga-ukitsishetyishi kowataipunaimetyishi, Jordan chuna nu John baptisma tayatra. She eku Parasai hano e Sadakai hano baptisma tyayatranishi dyika hawe tyeyekuiyatanishi kuwakachani e-tyayitsakuiya: Shruwi ga-iatratyaimishi, hau mani kutraiwastrani hawe tsunikunishi utsayawani si yuku utyetyuni? Shru eku uataipunaimishi
- 8 niukumunishi niushranikunishi me e pitrana, e bashrumi chaatrutsityishitana naya si dyu atsani Abraham sutra-naishityiashi tsa. She e-shrayitsakuiya Iusi itye towa yaoni dyika si Abraham iatra neiatraku. She e shru mi kiwa tseshi gaya-wawaitrani
- 10

- dyika si okupawani ga, shrue kiwa tsishi sai heme tsi tsa tawa tsa hitrani niyakasukunu, nu tsiupukawani
- 11 tsipashra dyika ye tsipayatanisu. Hinome wa utaipunaimi niya tsitsi niya baptisma shrayatra, she eku etyu hinome dyika hamashu hawe tsunyekunishi wa shikuyetyinaimishi yuku tsishatsi, amo me, tsatsi ga-hashuimi niwaushiputashikunu, emi wa Kukimuni Maiani niya e tsipashi niya baptisma niyatra-
- 12 kutruwatruma; ga-upuputsi kaikuiya, e ga-kawityiani shrami nayashikaku, e ga-ashrani uishitani dyika ye niushitaku, etyu bashra, tsa niepukakunishi tsipashi niya niyakaku.
- 13 She Jesus Galilee si tsutyu hau chuna Jordan
- 14 dyika, John dyika baptisma naitrakunishi niya. She etyu John tyiunamatsani tyanata: Sekka hishrome nu baptisma nitratyuma, she emi wa hinome dyika tuwe tsutru? Shrue Jesus tyipeyutani taatsakuiya: Mena truheetsi. She taa shruwatyiku sai uitonimi uwashu-
- 15 trani. She tyiuhetsani. Shrue Jesus baptisma tsitrani haikamitsi tsitsi dyika si dyu tsutyu; e Mu! kowatyuma taatawita, e huuka tsiyatanishi me Iusi ga-maiani nuku tsutyunishi e ai si dyu tyukuiyanishi tyiukacha;
- 17 e Mu! kowatyuma si nu katsanishi e-chatsa: Towa sa-mutyi tsa, tsiutsimunishi, emi niya shikunama.
- 4 Shrue Jesus shruwatyamu niya nyeetanatyunishi niya tsatyau ye Kukimuni Maiani niya taayutsee.
- 2 E tyana-wa-katsi tsaashitya-ma e tyana-wa-katsi bishu
- 3 kushruikani si yuku tyiyamashito. E tsiutanikuiyanishi hawe tsiyatyami e taatsakuiya: Tsi Iusi ga-mutyi emi
- 4 kutanu, chuwaya towa yaoni semita paetra. She etyu tyipeyutani tyanata: Tsidyatrani, hano tsatsi tu me semita niya nutraityanikusatyanu, etyu Iusi tsiika si
- 5 kumunishi sai ga-tsenityi niya. Shrue shruwatyamu tsityumi tsaashityitra ye dyu tsiyutseni, tsityumikatrutya ai dinya drutrutya si dyu tsikuiyani taatsakuiya: Tsi Iusi ga-mutyi emi kutanu, nu chaitrachanae. She tsidyatrani,

Wa ga-upeseyitanityaimishi neyayanikuiyaku,

Hishrome niya, gayamashityi niya nyeematashi-kutrumasa emi heya tsa shra-ashityi yaoni dyika noupaitsi-shrunu.

- 7 Jesus e-taatsakuiya: Tsika na tsidyatrani, Tsatsi Huchani kutra-Iusi niutanikuiya-shrunu.
- 8 Tsika na shruwatyamu mame tiye dyu kotyu ye dyu tyiyutse e gaishibishra dyu sayu we hatsishra e gaya-unamatseshi hawe tyiutrani; e taatsakuiya: Tsi hinome dyika nu shra-ashutotruma e hau amoma-tyiutrano, sai tsi towa niuyanishroma. Shruue Jesus e taatsakuiya: Yuku ima, Satan, she tsidyatrani: Huchani kutra-Iusi dyika hau naashutotru-shru, e emi nowe niukasha-shru.
- 11 Shruue shruwatyamu ai yuku si tsutyu; e Mu! ga-upeseyityaimishi hawe tyeeeku e tyiukashana.
- 12 Shruue Jesus kakani John taatyaweetyishi, Galilee
- 13 ye tsutyu; e Nazareth dyika yuku tsuku ni, Capernaum ai hau taatsi e ai chukuiya; (towa Capernaum Zebulon hatsi e Naphtali hatsi kuupichanishra e gaawaishra butru si dyu tsaashityitra ta); emi heya prophet Isaiah niya tsatsanishi e-naitrakuni, tyanata ni,
- 15 Zebulon ga-hatsi e Naphtali ga-hatsi, gaawaishra tsaityawi hiyani, Jordan chuna wewisa, nanami hano Galilee gaashetyishi. Tsamishityitsi tseemishi hano tseyatynishi mashra tseshi tyiukachana, e hushitoni ai gaapishra e ga-unushi-putyushra-gaya ai tyeemishi mashra, tyiwautra.
- 17 Emi tsaashityi si yuku Jesus shru chukatseta e e-chatsasu: Kaunamatsi itye-tseshra hawe ena kaetyita, emi heya chuwataipuniame.
- 18 E Jesus Galilee kutaa butru gaanitruyeya ni, dyue kuutyumutyaimishi, Simon taniatyishi Peter, e gatyumu Andrew tyuukacha, napapatsishi tsitsi dyika nu gaa-uityani, she shikaashu tyaaityatyikuiyanu; e tyaatsakuiya: Tuwe hamashu tyeema, e hano kayatyatyikuiya neyeetrashrauma. E tu haikamiku napapatsishi tu tyayatranutyu e hake hamashu tyeeyu. E

- 22 ai si yuku tsuku ni, tsika na dyue kuutyumutyaimishi tyuukacha, Zebedee ga-mutyi James e ga-tyumu John, kanue dyika dyu gaa-naishityia Zebedee tye, gaya-napapatsishi si tawa tyayatyityia. E tyuupeotsa. E tu haikamiku kanue e gaa-naishityia ai tu tyaaitra e hamashu tyeeyu.
- 23 Shruue Jesus sai ai Galilee-shra chaanitrutyaya, aiwatyami-gaya gaishimishetyishi ye tayasomeshitasu, e Kaunamatsi itye-tseshra niya tawa-mani chukatsetasu, e hano dyika sai tsi shra kui tse shitawawatsatyishi e sai tsi shra kui tse hiyatsani tyuwatsaipunaisu. E tsaanimasatyishi Syria sai ai shra tsutyu; e sai tsi shra kui tse hiyatsani e tsiunatyumenishi shitawawatsatyishi hano e ganatyaya-tsayatatyishi e ka-tsityishitani-tsiwatuityishi e tayaawishi hau tawatrutseyatanitta, e tyiwatsaipunaii. Shruue Galilee si, e Decapolis si, e Jerusalem si, e Judea si, e Jordan chuna wewisa si mame tsi hanowishi hamashu tyiwatsekkuiya. She tsi hanowishi kuwakashani, kotyu ye dyu tsutyu shruue ai si nu chukuiya ni, gayasomeshitanishi hawe tyeeeku; e tsiika tsaata e tyayisomeshita tyanatani:
- 3 Gayiuiyeetyi ga-maianishi amoma kaaumasatyishi, she Kaunamatsi itye-tseshra gashi.
- 4 Gayiuiyeetyi ayamakusatyishi, she nyiwashutsaniku.
- 5 Gayiuiyeetyi shrana-kusatyishi, she gaishibishra nutraiyaanikusa.
- 6 Gayiuiyeetyi uitonimishi dyika ye wa gaitramashityishi e gaipanoshitoshi, she nayatrukaeku.
- 7 Gayiuiyeetyi gayatyuityishi, she niwatyuityiku.
- 8 Gayiuiyeetyi gaya-winoshika tsiuyashityimishi, she Iusi niukachana-kusa.
- 9 Gayiuiyeetyi bishityi gayatyityia, she Iusi ga-iatra niyetrunimasaku.
- 10 Gayiuiyeetyi uitonimishi kutsi niya tsaimanityishi, she Kaunamatsi itye-tseshra gashi.
- 11 Kutrayiuiyeetyi su-tsi niya sutsi me neyania-kutruwatrumasatyanu, e neymanitsi-kutruwatrumasatyanu,

- e bato tsa chaimatsishranu, sai tsi kui-tsheshrama
 12 sutsi tsheshi neyania-kutruwatrumasatyanu. Truwa-
 nama e mame truwaushityia, she Kaunamatsi dyu
 tseyatyimishi niaitsuwani-kutruwatrumasa, she emi
 taa hishrome hama tsheshi prophets gayamanitsina.
 13 Hatsi dyu mina kutaapu; etyu tsi mina tsatsi mina
 me e-kaetranu, gowa mina niutraniku? Ai si yuku
 tsatsi tsi niutyawakunu, tu heme nyiuitsikuni e shrue
 14 hano gayashityi naya niyatanikuiyaniku ni. Gaishi-
 bishra mashra kutaapu. Kotyu dyu tsaashityitrashra
 15 tsatsi itye n'ushikumakumishra. Ku tsatsi hano ana-
 trani nyenatrakusatyanu e shrue uityimi naya ye
 nyipunaima-kusatyanu, etyu anatrani-uityitsimi si dyu
 nyityitsikusa, she katrutya sai haupa ai shra gaya-
 16 natrasu. Taa mashra kutraishimishi hano dyika ai
 yani si payanatra, emi heya tawa kutraitani niuka-
 chanakusanu e shrue Kaunamatsi gaapishi kutra-
 naishityiashi niuamashitanakusanu.
 17 Bami chaatrutsityishityia utsitokaii e prophets sutsi
 nitrasinishi niya hawe tsuseshi. Hawe tsusinishi wa
 tsatsi sutsi utranishi niya, etyu washutranishi niya.
 18 She kaimatsi shrayitsakuiya menashru gaishibishra e
 Kaunamatsi tsatsi na hatyi tsanu, tsatsi drusishu puta
 ku koimi puta utsitokaii dyika yuku n'yetyikunu,
 19 menashru sai tsi tsiwashutranishra. Towa ya hautsi
 koimiku towa tsiuwayanishi kaukayutsanu, e taa hano
 nyeyasomeshitakunu, Kaunamatsi itye-tshesha dyika
 dyu chai-me nyeenimasaku; she eku etyu, hautsi
 e-tsitrano e niisomeshitakunu emi Kaunamatsi itye-
 20 tshesha dyika dyu mame nyeenimasaku. She shrayi-
 tsakuiya, emi tsi tsa kutra-uitonimishi tsidyatraniku-
 sana e Parasai hano gaya-uitonimishi yuku nutse
 n'takunu, tsatsi Kaunamatsi itye-tshesha dyika ye
 nityeepu-kutrusatyanu.
 21 Kutra-ka ni hama tse hano niya tsanatani tsatsi
 niyawashrunu; e hautsi tsayawanu gaunashiyani nie-
 22 tanakunishi; etyu shrayitsakuiya, hautsi ga-tyumu dyika
 kotsayawanu, gaunashiyani nietanakunishi, e hautsi

- ga-tyumu tsatsakuiya, *Peshana*, gaunashiyani kowa-
 chani dyika ye niyutsekunishi, she etyu hautsi
 23 kanata, Tsa kowakunii, gaunashiyani shruwatyamutse
 tsipashi niya. She tsi kutra-ashityiakumishi ai-
 ashityiakumishra dyika ye shraikkuiya e ai kutra-
 24 tyumu haityi tsi niya tutruiyani shrutyumishranu,
 kutra-ashityiakumishi ai ashityiakumishra dyika picha
 e yuku ima, tsaya kutra-tyumu chayashutsanu, shrue
 hawe si ima kutra-ashityiakumishi chaashityiaku.
 25 Kutyiupinaimityishi shatru truushrani, tu na hiyani ye
 kutyeeanyi; tsi shru tsi kutyiupinaimityishi tsayatani-
 kuiyanishi dyika hau kutyikuyanu, e shrue tsaya-
 tanikuiyanishi tsayatyatikuiya dyika hau kutyiku-
 26 yanu, e shrue hishrome utsitani dyika hau shaapu-
 naimetyanu. Kaimatsi shrayitsakuiya, mame tsatsi
 itye niuushrunu menashru sai tsi shraitsuwanu.
 27 Kutra-ka ni tyanatani, tsatsi tuwe nyeiauia-shrunu;
 28 etyu shrayitsakuiya hautsi tsiutsipyutyishi me ku kume-
 29 kumenu, mishru ga-winoshika dyika tsiuia. E tsi
 shrumikawaya kutra-ana anachupatsi kutyityitanu,
 tyiupuku e tratyitru, she tseyatyimishi yuku kutrayi-
 uieetyi shini si tu drusishu tu kutrutranu e tsatsi sai
 30 shini shruwatyamutse ye nu tsaawinu. E tsi shrumi-
 kawaya shramashityi anachupatsi kutyityitanu, yuku
 chutsutrutsa shrue traawi, she tseyatyimishi yuku
 kutrayiueetyi shini si tu drusishu tu kutrutranu e
 31 tsatsi sai shini shruwatyamutse tsunyekunu. E tsika
 tsanatani, tsi hautsi ga-okui yuku-tsikuyanu, yuku
 32 ayakuyani tsidyatranu peeou; she etyu shrayitsakuiya,
 hautsi ga-okui yuku tsikuyanu, tsi tsa aianowitsitani
 niya, tuwe uani kaukitsa tsitra, e hautsi yuku tsiu-
 kuyanishi tsika tsiwakuitranu, tuwe uani kaukitsa.
 33 E tsika na kutra-kani hama tse hano niya tsanatani,
 bami tsa kaimatsishi me chaakaesukuiyanu, etyu
 34 Huchani dyika kutra-akaesuni e piwashutra; she etyu
 shrayitsakuiya, bami mi chaakaesukuiyanu, tsatsi
 35 Kaunamatsi niya, she Iusi ga-upishishra tsa, ku tsatsi
 hatsi niya, she Iusi ai dyu kaashityishani tsa, ku

tsatsi Jerusalem niya, she tsichu Rai ga-ashityitra tsa,
 36 ku bami shra-nushika niya chaakaesukuiyanu, she
 tsatsi itye ishike puta kutra-hadrani shamutsi ku
 37 mishityitsi nitra-shrunu. She etyu emi shratsanishi
 Ha, Ha; Tsa, Tsa, pee; she haityi towa mina yuku
 tsanu sutsi dyika si kumu.
 38 Kutra-kani tyanatani, Hoanani hoanani niya tsa-
 39 aitsuwani, e hachani hachani niya tsa-aituwani; she
 etyu shrayitsakuiya, bami sutsishu hano tseshi pu-
 yeetsani, etyu hautsi shrumikawaya shruwapu kutru-
 tyishatsa, ishika shruwapu tsika hau piwishigutraimi.
 40 E tsi hautsi kutyi-waitawanu, shrue naya dyu kutra-
 wakuni kutru-satyutsanu, tsika hau dinya nu si
 41 kutra-wakuni nyeou-shru. E hautsi sekka kutyi-tranu
 42 ishike mia utsutsi, dyue mia chutyimutyu. Peou hautsi
 kutruitaanishi, e hautsi niushitsa-kutrumanishi, bami
 yuku piawa.
 43 Kutra-kani tsanatani, Ai kutraama yuwi si nu
 gaamishi niutsimushru, e kutru-iyaniishi niuyanishru;
 44 etyu shrayitsakuiya, kutru-iyaniatyishi niwatsimu-
 kutrusa e kutyi-manitsishetyishi amoma paiwatrani;
 45 emi heya Kaunamatsi gaapishi kutra-naishityiashi
 nyeya-mutyi-kutruwatrumasa; she sutsi tseshi e tawa
 tseshi dyika dyu ga-oshratra tsishibitratyusu, e shrami
 tseshi e tsa shrami tseshi dyika dyu tsaachanawita.
 46 She tsi kutraya-tsimunityishi kutruwa-tsimunu, tsi
 haityi nutrayaishiawa-kutrusa? Kume tsa hemaku
 47 kayakitaukuiyana e-taa? E tsi nowe kutra-tyumutyai-
 mishi Gowa Tsi shrayatranu, hatsushu shitrana?
 48 Kume tsa nanami hano emi e-taa? Emi heya Kauna-
 matsi gaapishi kutra-naishityiashi tseyatyimishi-me
 e-tsekuiyanishi, emi taa trutyu mu tseyatyimishi-me
 e-n'taapu-kutrusa.
 6 Tsatsi kutraya-uitonimishi hano dyika ai yani,
 tuma hano niyekachanakutruwatrumanishi niya e-
 nitrana-kutrusatya ni bashru nutrusa-kutrusa, tsi shru
 tsi tsatsi Kaunamatsi gaapishi kutra-naishityiashi si
 2 nyeyaani-kutruwatrumasatyanu. She uyaityani hau e

nitrana-kutrusatyi, bami yuku yani uputsi puputsanu,
 emi e gayauitutyityia e tsityityiata aiwatyami-gaya ai
 gaya e hiyani ye tuma hano niwakutsa-tsiwatrumanishi
 niya e-tsaa. Kaimatsi shrayitsakuiya, mishru gaya-
 3 yaaniwa. She etyu uyaityani hau e-nitra-shru ni, bami
 4 ishuya shramashityi piutoni tsi haityi shrumikawaya
 shramashityi kui tsitraniishi; emi heya kutra-uyaityani
 niushikumashityiku, e ushikumashityi niya kuukacha-
 nishi kutra-naishityia nyeyaani-kutruma.
 5 E tsika, amoma shitrantati, tsatsi gayauitutyityia-me
 e-n'taapu-kutrusatya; she niwakachana-tsiwatrumasa-
 nishi niya aiwatyami-gaya ai gaya e hiyani shukuna
 dyika ye tseechanishi amoma utyitani anye-kusa.
 6 Kaimatsi shrayitsakuiya, mishru gayayaaniwa. Etyu
 hishrome, amoma shitranu, wa ai gaya ye niupu-shru, e
 tsiama shaashani kuishikumashityi kutra-naishityiashi
 hau si amoma pitra; shrue kuishikumashityi kutra-
 7 naishityiashi kuukachani nyeyaani-kutruma. E amoma
 shitrantati bashrumi kee si e tratsiatyasu, nanami
 hano me; she tsinaitranishi naoya atsani niya niwakana-
 8 tsiwatruma. Bami we me tyeeshi, she tsa na shruwitaa,
 mishru kutra-naishityia kutoni tsi niutsipu-kutrumani-
 9 shi. Shrue taa amoma pitrana:
 10 Sutra-naishityiashi, Kaunamatsi dyika
 shraapishi, E-shrashi tsityumishi pee. Kutra
 itye-tshesha hawe si ima. Emi e kutra-uwayanishi
 Kaunamatsi dyika dyu e tsiutranishi, tsika emi
 11 e hatsi dyika dyu e-paitra. Tsaashityama
 sutra-upbewishi towa tsaashityi hau ye
 12 gaiwatrani. E sutaaputyishi dyika kukitsanatyishi
 siwawataipunaityishi me, emi e nutrumu
 13 sutra-ukitsishi gowawataipunaii. E bashrumi
 ayatanikuiyani dyika ye gaitrutseyata, etyu
 sutsi tseshi dyika si gayatoinaii. She itye
 kutrashi, tsishatsi kutrashi, uamashitani kutrashi,
 tsiyakamitse. Taa pee.
 14 She tsi hano ga-ukitsishi shruwawataipunaimanu,
 kutra-naishityiashi Kaunamatsi gaapishi niwawatai-

- 15 punai-kutruwatrumasa. Etyu tsi tsa hano ga-ukitsishi shruwawataipunaimanu, kutra-naishityiashi tsika tsatsi kutra-ukitsishi niwawataipunaima-kutruwatrumasatya.
- 16 She e tsika, hama shruwashruikametyanu, bami gayaitutyityia-me amome-tsa kutruwawawi n'taapu-kutrusatya, she kowawawi-shikutru-taityia kuwashruikashisu hano niwakachana-tsiumanishi niya.
- 17 Kaimatsi shrayitsakuiya, mishru gayayaaniwa. Etyu hishrome, hama shrushruikanu nayaitashru e nanawai-shityi-shru; emi heya shrushruikanishi tsatsi hano dyika tyiemi n'takunu, etyu ushikumashityi niya kuukachanishi kutra-naishityia dyika, shru e kuishikumashityi kuukachanishi kutra-naishityiashi nyeyaa-ni-kutruma.
- 19 Bami tui gaishibishra dyu shruwatrutsi niya tsityumishi pishityia, ai hatyi mita e mayatra tsiupbeukuiyanishra, e kuwachawaityia niutroshita-kusatyishi nuwachawana-kusatyishra; etyu Kaunamatsi dyika dyu shruwatrutsi niya tsityumishi pishityia, ai hatyi mita e mayatra tsatsi tsiupbeukuiyanishra, e ai hatyi kuwachawaityia tsatsi niutroshitakusatyishra e tsatsi nuwachawana-kusatyishra. She ai hatyi kutra-tsityumishi
- 22 kutrashishra ai tsika kutra-winoshika ni-ku. Hoanani tsini ga-anatrani tsa. Shru e tsi ishikawa kutra-ana ishike-me tsanu, sai shini mashra tsa. Eku etyu tsi kutra-ana sutsi tsanu, sai shini tsamishityi tsi. E shru e tsi kutra-mashra mishityitsi tsanu, hatsumaku tsamishityi tsi! Tsatsi hau itye dyue yani-tseetyishi niutsitokaikunu, she ishike niuyaniku, etyu ishika niutsimuku, ku ishike niukiniraniku, etyu ishika tsatsi tsi niukunu. She tsatsi itye Iusi e tsityumishi shikaewa niutsitokai-kutrusatya. Emi heya shrayitsakuiya, kutra-ianishi niya bashrumi mamutyi chuwatsityishityia, tsi nupbe-shrunishi e tsi niishika-shrunishi, ku e tsika shini-kutrashi niya tsi niwaku-shrunishi. Gao tsa iani upewi yuku tseyatyimishi ta, e gao tsa tsini wakuni
- 26 yuku tseyatyimishi ta? Puwakachana howaka ye gayatanishi, wa emi tsatsi kautyisetya e tsatsi

- kowawaityiatya e tsatsi kowaushityityiatya; she etyu kutra-naishityia Kaunamatsi gaapishi gayityisheta. Kume tsa gayatanishi yuku tseyatyimishi yatra
- 27 tyitaapu? Hau ye emi kautsityishitanu itye ishike
- 28 kamashityi-tsiwityimi kotranishi nityaoku? E tsika, tsekoma wakuni niya tsityishityi-kutrusa? Chuwa-tsityishityia tsaishra ye agutrutsi, gowa kaatonityishi.
- 29 Tsatsi kowatanitra, e tsatsi kuwakatsisu; she etyu shrayitsakuiya, Solomon mame dinya kaukenatsi tsatsi
- 30 tumaku kuwaku. Etyu tsi Iusi hemaku tsaishra gamushru tsiwakunu, emi wai eetse e nachama bahuishitani hake niukuyawiku, kume tsa mina yuku niyawaku-tutruwatruma? Mame koimi kutruwahimatyishi! Shru eku bami tsityishityi-trusa e trana, Tsi n'traape-sutrusa? ku, Tsi n'traashikata-sutrusa? ku,
- 32 Tsi n'truwawaku-sutrusa? She sai tsi towa nanami hano tsiyaipatyikuiyana; she etyu Kaunamatsi kutra-naishityia kutoni sai tsi towa nyiwyatya-wakutrumanishi.
- 33 She etyu tsaya piyaipana Iusi itye-tseshra e Iusi ga-uitonimishi, shru e sai tsi towa hau nyeyawityami-kutruwatruma. Emi heya bami nachama niya tsityishityi-trusa, she nachama noyu tsityishityi-nautruku.
- 34 Wai sutsi kaetranishi mishru wai washu tsa.
- 7 Bami tuwe tsi peyanaitrani emi heya trutyumu
- 2 tsatsi tuwe tsi nyeyanaitrani-shrunu. She tsi
- 3 haityi shiya shayanaitrani-shru, taa tsika nyeyanaitrani-shru; she haityi uityimi heya shityimetya,
- 3 tsika emi heya nyeeuityimi-kutruwatrumasa. E tsekoma kutra-tyumu ga-ana ai nu drusishu puta tsiuwamunishi shrukachanikuiya, etyu kutra-ana ai nu
- 4 pitrami kutruwamunishi tsatsi tsi shrunu? Ku gowa kutra-tyumu nietsakuiya-shru, Kuyani kutra-ana nu kutruwamunishi dyu kaoku, etyu Mu! pitrami noyu
- 5 kutra-ana nu kutruchu? Kaitutyityia kuta! Tsaya noyu kutra-ana si dyu pitrami puku, shru e menashru tyiemi niukacha-shru kutra-tyumu ga-ana nu tsi
- 6 drusishu puta tsiuwamunishi dyu ukumi. Bashrumi tsi tsityumishi diya payawachani, ku bashrumi kutra-

ushityikuni petsoty hake yani payawakuiyawimi, tsi
 shru tsi gayatanatya, shru tsi kaishigutrainu e kutyi-
 7 ushratyitsanaty. Chuwautana, shru niyaapi-kutru-
 watrumasa; piyaipana, shru niyainawa-kutrusa; pu-
 8 pinatsana, shru niaatawita-kutruwatrumasa. She
 haupa kuwitaanishi, tsayaapi; e tsiyaipasushi tsiyainasu
 e hau kupinatsanishi, nieetawita-tsaumasa. Ku
 9 hau ye emi hatrutsai hau ga-mutyi tsi semita
 10 kuwitaanu, kume yaoni niutyityu? Ku tsi shikaashi
 11 kuwitaanu, kume shruwi nyeutyu? Shru tsi sutsi me
 kutaaputyishi gowa tawa ayaapi tseshi kutra-iatratyai-
 mishi dyika kutrusatya-ayaapi, hatsumaku yuku kutra-
 naishityia Kaunamatsi gaapishi tsi tawa tseshi
 12 tyuitanakuiyana nyeyaouku? Shru sai tsi hano
 nyewatranita-kutruwatrumasanishi e kutruwatsiputya,
 emi e trutyumu nyewatranita-kutrusa; she towa
 utsitokai tsa e prophet tsa.
 13 Drugashuka tsiamu ye hake tyiepu: she ayataani
 dyika ye tsunikunishi wa gachuka tsiamu tsa e tsiya
 hiyani tsa, e mame tsi hanowishi hake tseepusu.
 14 She etyu iani ye wa drugashuka tsiamu e drutsiya
 hiyani tsa, e tsiyainawatyishi mame hatsue tsaapu.
 15 Tsa kaimatyishi prophets truwayukai; she kanieru
 gawakunishi kuwaku ni haweku kutruwatsekuiyata,
 16 etyu naya ye kakana kautanishi me e-tsaapu. Emi wa
 hitrani niya niyetrunimasa-kutrusa. Ipani si kume
 hano mataiku chaautyityia? ku haika si figs chaautyi-
 17 tyia? Emi taa sai tawa kiwa tsishi tawa hitrani
 tsiyakasu, etyu sutsi kiwa-tsishi sutsi hitrani tsiya-
 18 kasu. Tawa kiwa-tsishi tsatsi itye sutsi hitrani
 niyakasukunu, e sutsi kiwa-tsishi tsatsi itye tawa
 19 hitrani niyakasukunu. Kiwa tsishi sai heme tsi tsa
 tawa tsa hitrani niyakasukunu, tsiupukawani tsiyashra
 20 dyika ye tsiyatanisu. Shru wa hitrani niya niye-
 21 trunimasa-kutrusa. Tsatsi mame sai heme, Huchani,
 Huchani, shikatsakuiyanu itye Kaunamatsi itye-
 tseshra niupukunu; etyu Kaunamatsi gaapishi sa-
 22 naishityia ga-uwayanishi e tsekkuiatyishi. Emi e

tsaashika ni mame naoya hanowishi niyenia-shikuma-
 sa, Huchani, Huchani, Gao tsa E-shrashi niya tu-
 traesomeshityia, e gao tsa E-shrashi niya ganatyaya
 23 tayiwatyikume, e gao tsa E-shrashi niya mame naoya
 imi-me ishatsini fitrana? Shru niyetsakuiya-si tsatsi
 hama shrayitrunima; sutsi me shruwatanitranishi yuku
 tyeeekuma.
 24 Emi heya hau tsi towa sa-mani kakanu e emi e-
 tsekkuiya, tsi kutonishi hano nishigayunawa-si, wa ga-
 25 ama yaoni si dyu kaatra; shru chaacha e tyuichumu
 e natrani tyeeshitaya, e shru towa katrutya tyusha-
 yana e tsatsi putyanu, she ai yaoni dyika si dyu chinu-
 26 tsani. E hau tsi towa sa-manishi kakanu, e shru tsatsi
 emi e tsitranatya, tsa kuwakunishi hano nishigayunawa-
 27 si, wa ga-ama yaai si dyu kaatra; shru chaacha e
 tyuichumu, e natrani tyeeshitaya, e shru towa katrutya
 tyushayana e putya, e mame maima putya.
 28 Shru e chaetra Jesus towa mani kaunaottani,
 hanowishi tsi gayasomeshitanishi niya imima tayatra.
 29 She itye e gashi me tayisomeshita, e tsatsi tsidyatra-
 nikusana me.
 8 E kotyu hawe si nu tsutsi mame tsi hanowishi
 2 hamashu shichaku. E Mu! Leper niya tsiyatsanishi
 tuwe tsutyu, e amoma-tyitra, tyanatasu, Huchani, tsi
 3 e-shrunu itye niukayatyuma. Shru Jesus kamashityi
 hau chaotta e tyiupakatsa, tyanatani, E-si, trukaya.
 4 She tu haikamiku ga-leprosy tyiukayawi. Shru Jesus
 taatsakuiya, Bashrumi hautsi pupe; etyu hake ima,
 chayani putrukacha, e emi chayanishi dyika nityiem-
 tranikunishi niya Moses ga-uwayanishi ayaapi hawe
 niutrani-shru.
 5 Shru Jesus Capernaum tsaashityitra ai hau tsaatsi
 ni, katsi-wa-katsi kawaiptyia yani-tseshi hawe tsutyu,
 6 tyuitanikuiya tyanata, Huchani, sa-tanitrani katrutya
 ai tsikai yayu niya tsiwasa e mame tsiunatyumita.
 7 Shru Jesus taatsakuiya, Hawe tsunisi, niutsaipunawa-
 8 si. Katsi-wa-katsi kawaiptyia yani-tseshi tyipeyutani
 tyanata, Huchani, hishrome saama sutamishi hake

naya ye niupu-shrunishi, hinome tsatsi yatra shityanu; she etyu tu me mani e tratsa, shrue sa-tanitrani
 9 niutsaipu-tsiumanu. She nutyumu sa-utsitokaiwani wa, e hinome dyika naya kawaiptyia suwatrukai, shrue towa hatrutsai seetsakuiya Ima, shrue tsuku; etyu ishika, Tuwe ima, shrue hawe tsuku; etyu sa-tanitrani, Towa e-pitra, shrue e-tsitra. E Jesus kakani tyiowanutsa, e hamashu tsekkuiyanishi tyayitsakuiya, Kaimatsi shrayitsakuiya, tsatsi hemaku uhimaty
 11 shityiyaina, tsa, tsatsi Israel hano dyika si. E e-shrayitsakuiya, mame tsi hanowishi yue ha ni e yue bu ni nityeekukusa, e Abraham e Isaac e Jacob haupa ai
 12 Kaunamatsi itye-tshesra si nu naatakusa, etyu itye-tshesra ga-iatratyaimishi chaatya ye tsamishityi-tshesra ye niuyatani-tsiwatrumasa. Ai niyetyikuiya-niku e hachani nyeiushikunutsitaniku. Shrue Jesus katsi-wa-katsi kawaiptyia yani-tseshi taatsakuiya, Ima; she emi e kutru-himanishi emi hishrome e putrutra. E ga-tanitrani emi e ura tsa ni tyiutsaipu.
 14 E Jesus Peter ga-ama hake kupuni, tyiukacha Peter ga-okui ga-naia gaachatyishi niya tsiwasanishi ai tyikai.
 15 E kamashityi tyiupakatsa, shrue gaachatyishi tu tyitra.
 16 She dyu tyiipatyu e tyuikasha. Shrue shapuka ni ganatyaya-shityityatyishi naoya tsa tawatrutseyatanita, e ganatyaya si taiwatyikumi ga-mani niya; e sai tsi-wawasatyishi si tyayiwatsaipunaii. Emi heya Prophet-tseshi Isaiah niya katsanishi e-naitraku, tyanata: He noyu sutra-hiyatsani chaokuiya, e shrawawasatyishi sai chaatyeya.
 18 Shrue Jesus mame tsi hanowishi ai shriena tseemishi kuwakachani tayayanikuiya, wewisa hake utsutsi.
 19 Shrue tsidyatranikusu hawe tsutyu e taatsakuiya: Tsayasomeeshita, hamashu niyetrutye-shrauma hekota tsushrunu. E Jesus taatsakuiya: Tsushiki gowatrotyi, e howaka gayatanishi gowawaa; etyu hano ga-mutyi tsatsi tsi hatyi ai ga-nushika niyenamatyikunishra
 21 tsanu. E ishika haityi gayisomeshitanishi taatsakuiya; Huchani, kuheetsani tsaya hake si utsutsi, sa-naishityia

22 utyaitsimi. Etyu Jesus taatsakuiya: Hinome dyika hamashu ima, e kaashitonishi noyu kaawishi
 23 peetyaitsime. Shrue kanue dyika dyu kupuni, tayisomeshitanishi hamashu tyiwatsekkuiya. E Mu!
 24 Kanue dyika dyu chutashikatsita heme tsitsi kutaa dyu mame tsishatsi tyunatratya, etyu tsiipai. E
 25 tayisomeshitanishi hawe tyeeku, e tyitrachuwana, tyana: Huchani, gayatragu, naawishrusa. E tyayitsakuiya: Tsekoma shraaputsanishi, Tu koimi tsiwahima?
 Shrue si dyu tyutaatyu, e natrani e kutaa tyiunamatsa;
 27 shrue mame bishityi chaetra. E we hatrutsai mame chaaputsa, tyaana: Tsi kui tse towa hatrutsai tsa, e mu puta natrani e kutaa tsiutsitokaii.
 28 Shrue wewisa Gadarine hano ga-hatsi dyika tsaatsini, dyue ganatyaya-tsaatyatyishi shumu ai-ityaitsimishra hawe si tyuumu tyiwataimutyu mame taanowani,
 29 tsa hau hano niyatukuni me. E Mu! tyuushigaitsa tyanikuiya: Tsi haityi dyika shrui ni sutaa, Iusi gamutyi? Tsa na chitye kaetrani tuwe tsutru kuwanieityi-tatyumanishi niya ka? She ai si yuku tiye tshesra dyika
 30 naoya tsa petsoty tsiwatsi ai nu tyaape. She ganatyaya tyiwittaana tyana: Tsi si tyiwatyikuma, gaiwaheetsani
 32 petsoty tsiwatsishra dyika ye utsutsi. Shrue tyayitsakuiya, Tyeekuma! E hawe si tseemu ni petsoty tsiwatsishi dyika ye tyeeku. E Mu! Sai tsiwatsi petsoty roku me tsitsi kutaa dyika katuwina ye nu chaya-petsa, shrue tsitsi dyika nu sai chaawi. E kuwawaa
 33 tseshi tyappayu, e tsaashityitra ye nu tyeeku e sai tsi tyipenu, e tsi kui kaetranishi ganatyaya tsayityatyishi niya. Shrue, Mu! Tsaashityitra hano sai haupa
 34 hawe tyeemu Jesus tyiwataime, e tsiukachanaty tyiwittaana gaya-hatsi yuku si utsutsi.
 9 She kanue dyika dyu tyiupu e tyumu, e noyu gashityitra hau si taatsi. E Mu! Yayu niya tsiwasatyishi taayutsemitta, uityityi dyu tyikai. She Jesus uhimaty gashi kukachani, yayu niya tsiwasatyishi taatsakuiya: Sa-mutyi, tru-uishityia, kutra-ukitsishi truwataipunaimi. Shrue Mu! emi eyu tsidyatranikusana naya si

- dyu e tyatsia: Towa hatrutsai sutsi-me katsetatyasu.
- 4 E Jesus kaatsityishitanishi kutoni, tyanata: Tsekoma sutsi me kutra-winoshika naya dyu shruwatsityishityia? e taatsakuiya: Hinome hamashu ima. She dyu tyu-taaty e hamashu tsutyu.
- 5 She haityi kaosa anatani tsa, Kutra-ukitsishi truwafai-punaimi; ku, Ipatyu e anitrutyeya? Etyu hano ga-mutyi tui hatsi dyu ukitsi ayataipunaimi itye e gashi niutoni-masa-kutrusa . . . Shrue yayu niya tsiwasatyishi taatsakuiya: Ipatyu, kutra-uityi si dyu pita, e kutraama ye si ima. Shrue tyiipatyu, gaama hake si tsutyu.
- 7 E tsi hanowishi kuukachanaty chaaputsa, e Iusi tyi-uamashitana she hano dyika we me itye gayaapishi niya.
- 8 Shrue Jesus hake si tsiyetyutsi Matthew taniatyishi hatrutsai tyiukacha, aitsuwani-aitsuwanishra ai si tya, e taatsakuiya: Hinome hamashu ima. She dyu tyu-taaty e hamashu tsutyu.
- 10 She e chaetra, Jesus katrutya gaya kaauyataukuiya ni, Mu! naoya kaukitaukuiyana e kukitsityia hawe tyeeke e gaapishra e gayisomeshitanishi haupa ai si nu chaata. E Parasai hano towa kuukachanaty, gayisomeshitanishi tyayatsakuiyana: Tsekoma kutrayasomeshita kaukitaukuiyana e kukitsityia haupa shrauyatawa? Etyu Jesus kakani, tyayitsakuiya: Kuwanatsanishi tsatsi wawakusu tsiwatsiputyanu, gaityi emi tsiwawasatyishi. Etyu hake tyeeekuma chuwatyumitra tsi emi towa mani tseshi, Ayatyuityi shikutsipu, e tsatsi uyaityani. She hawe tsuseshi wa tsatsi shrami tsaaputyishi uwapeotsanishi niya, etyu emi kukitsityiatyishi.
- 12 She John gayisomeshitanishi hawe tyiwatseeku, tyaana; Tsekoma Parasai hano e hinome suwautyashikuya etyu kutrayisomeshitanishi tsatsi kuwautyashikuiyanu. Shrue Jesus tayitsakuiya: Naudyatrakunishi kuwataatsi itye ai shriena kaatatyishi nifruwatyashityusa? She etyu tsaashityi hawe nyeeshityusuku naudyatrakunishi yuku nyeeuyutsiku, shrue menashru nutru-wautyashi-kusa. Tsatsi hau hano natsi chananatsishi tsawini wakuni dyika ye naumashitanashakunu, she ai nu tsiupunaimishi, emi heya niunaottakumishi, wakuni

- yuku si kayaokuiya, e shrue gotrotyishi tsi gaapesu.
- 17 E tsatsi hano natsi wino tsawini shipuna dyika nu tsisekuiyanatya, tsi shru tsi shipuna tsayukanu e wino wakaniku, e shipuna nayataaku. Etyu natsi wino natsi shipuna dyika nu tsisekuiyana, e shikaewa nyeeitragumiku.
- 18 Tu na towaya shiya katsanishi, Mu! emi eyu huchani hawe tsutyu, e hau nu chaashutotruni tyanata: Sa-maku menashru kushityi; etyu hawe ima, e shramashityi niya pupakatsa, shrue si niaku. She Jesus dyu taaty hamashu tsutyu, e tsika gayisomeshitanishi. E mu! Katsi dyue tsitra kashraityi matsi tsiwatsimusu niya tyiwasu kuitsa yue kaatya hau tyiatsi, e ga-wakuni hau si dyu kaosityitsishi tyiupakatsa; she naya si dyu e-chatsa, Tsi bato heme ga-wakuni tiupakatsaniku nitragu-si. Etyu Jesus hau si chaishigutra e tyiukacha, shrue taatsakuiya: Makutsa, shratsaani. Kutruhimatyishi niya shitrugu. Shrue ai si yuku kui-tseshi chitrugu. She Jesus huchani gaama hake kupuni e kuushipiurutsutyia e hano ganashiyani tsaapu kuwakachani, tyayitsakuiya: Peeshityuwanita; she makutsa tsatsi kushityishra, etyu tsiipai. She taamayankuiyana. Etyu shrue hama hano chaatya ye tsiwatyikumetyi, hake si tyupu, e kamashityi si tyitya, shrue makutsa dyu tyiipatyu. E towa tsaanimasatyishi sai ai shra hatsi tsutyu.
- 26 Shrue Jesus ai yuku si tsutsi, dyue tsa-tsaikashityishi hamashu tyeeuyu tyiushigaitsanityu e tyaanakuiyasu: David ga-mutyi, kuutyuityikuiya. Shrue katrutya hawe kupuni, tsa-tsaikashityishi hawe tyeeuyu, e Jesus tyaatsakuiya: Tutruuhima itye towa e-nitrasinishi? E taniaputyu; Ha, Huchani. Shrue gaa-ana tyiupakatsa, e tyaatsakuiya: Kutruuhimatyishi niya emi taa e-truutraa. E gaa-ana taa-ata. E Jesus mame tsishatsi me e-tyaatsakuiya: Bashru nutruu-kutruu tsa hau niutoni-kunishi. Etyu yuku si tsee yi sai ai shriena hatsi dyu tsaanimasatyishi tyiutonimishitratyu.
- 32 E wa emi hake si kumunishi, mu, tsa-katsanishi e

ganatyaya tsityatyishi hatrutsai hawe tauyutsemitta.
 33 E ganatyaya tsaatyikumetyi, tsa-katsanishi tyamashra.
 Shrue tsi hanowishi imi ma tyiwautra, tyaana: Israel
 34 ga-hatsi dyu tsatsi hama taa tyukachana. Etyu
 Parasai hano tyaana: Ganatyaya gaya-yani tseshi niya
 ganatyaya si kutyikusu.

35 Shrue Jesus ai shra tsichu tsaashityitra e drugasha
 taashityitra chaanitrutyaya e aiwatyami-gaya ye
 tayasomeshita, e Kaunamatsi itye-tseshra niya tawa-
 mani chukatsetasu, e sai tsawawasatyishi e hiyatsani
 36 tyuwatsaipunaisu. E tsi hanowishi kuwakachani amo-
 tyuwatrutsityishita, she gowa ma tayatra ni e sai
 37 chushramatsani, kanieru tsa hau gawaanishi me. Shrue
 gaumatsityaimishi ye tyayitsakuiya: Kaimatsi tsiwai-
 tyani naoya tsa, etyu kowatanitranishi hatsue tsaapu.
 38 Tsiwaityani yani tseshi dyika ye amoma pitrana,
 tsiwaityani ye kowatanitra uiyatani.

10 Shrue katsi dyue tsitra ga-umatsityaimishi tyiwa-
 peotsa, itye tayiwatrani, sutsi maianishi ayawatyikusu
 e sai tsi hiyatsani e sai tsi uwasaty ayayatsaipunaimi.

2 She katsi dyue tsitra ga-umatsityaimishi taa E-
 gaya: Tsaya tseshi, Simon, Peter tsaniatyishi, e ga-
 tyumu Andrew; Zebedee ga-mutyi James a ga-tyumu
 3 John; Philip e Bartholomew; Thomas, e Matthew
 kaukitaukuiya; Alphaeus ga-mutyi James e Thaddaeus;
 4 Canaan me Simon, e Judas Iscariot, emi tsika hau
 5 tsikuyanishi. Towa katsi dyue tsitra Jesus ai si shra
 tyayayata, e tyayatynaika tyanata:

Bashrumi nanami hano tseshi ga-hiyani ye wa
 tyekkuma, e bashrumi Samaria hano ga-tsaashityitra
 6 ye tyiepu, eku etyu Israel katrutya kayawanishi
 7 kanieru dyika ye tyekkuma. E kutyekkuiyatani
 nuwakatsetyia-kutrusa nutrana-kutrusa: Kaunamatsi
 8 itye-tseshra hawe ena kaetyita. Shitawawasatyishi
 puwatsaipunawa, kaawishi si dyu niaputyume-kutrusa,
 leper tsiwawasatyishi niwakayawana-kutrusa, gana-
 tyaya si niutyikuse-kutrusa. Ayaapi me shrayaou,

9 ayaapi me peyaou. Bami uru ku kasha-sawaka ku
 gayashityi-sawaka kutra-ushitani nu chuwaushityityi-
 10 tyia; e bami shika-ani niya ushitani ku dyue wakuni ku
 hashuimi ku uchashitani haku pityityia; she kutanitran
 11 dyika ga-upewi yatra tsa. E tsi haityi tsaashityitra,
 tsishu ku drusishu, hake tyeeponu, piyaipana-kutrusa
 ai dyu hau yatra tseshi e ai naata-kutrusa menashru ai
 12 si yuku n'tyeeku-kutrusatyi. E katrutya kutyeepe ni,
 13 piminatya. E tsi we katrutya yatra tsanu, pinamata-
 wana; etyu tsi tsa yatra tsanu, kutra-uinamatyani si
 14 chuwaitiyame. E tsi hau tsatsi kutruwashutsanu, e
 tsatsi kutra-mani kutruwakanu, tuwa katrutya e tuwa
 15 tsaashityitra hake kutyemu ni kutraya-ashityi nuwapa-
 katsana-kutrusa. Kaimatsi shrayitsakuiya, Sodom
 ga-hatsi e Gomorrah ga-hatsi niya nyeetrutsityishitani-
 16 kunishi hemaku tsatsi towa tsaashityitra niya nyeetru-
 tsityishitanikunu, ayatani tsaashityi-tratyuni. Mu,
 shrayayata kanieru kakana tseemishra me ye. Shruwi
 17 kautsityishityiwanishi me e huuka tsatsi kautsayumishi
 me kutruwataa. Etyu hano bashru-trusa; she tsayawa-
 18 tyamishra dyika hau niyayatana-kutruwatrumasa, e
 aiwatyami-gaya ye niyashayana-kutruwatrumasa. A,
 Kaimatsi, dapopo e rai dyika ye su-tsi niya n'yetrutsee-
 19 kutruwatrumasa, emi heya wewa dyika e nanami hano
 dyika, hinome nityemitrana-tyumasa. She etyu dyu
 20 kutrayikuiyanaty, bami chuwaushityityia tsi gowa ku
 tsi kui natrana-kutrusatyishi, she we ura nu niyaapi-
 21 kutruwatrumasa tsi natrana-kutrusatyishi. She e-
 katsanishi wa tsatsi emi hishrome, etyu kutra-naishi-
 tyiashi ga-maianishi hishrome niya e-katsanishi tsa.
 22 E ka-tyumu emi noyu ga-tyumu nyeotawa dyika hau
 nikuyaku, e naishityia tseshi noyu ga-iatra, e iatratyai-
 23 mishi naishityia e naiatyaimishi dyika hau si nayaishi-
 gutraikusa, shrue nyiwanakusa. E E-seshi su-tsi niya
 sai hano niwaiyani-kutruwatrumasa; etyu hautsi
 tsiinaottanishi hema kaushigitsanu nitraguku. She etyu
 towa tsaashityitra dyu hama kuwanyeyatratrumasa
 n'traapayu-kutrusa, ishika dyika ye. She kaimatsi

- shrayitsakuiya, tsa na Israel ga-tsaashityitra sai kutyeemuni menashru hano ga-mutyi hawe tsuniku.
- 24 Tsasomeshityia tsheshi tsatsi tayasomeshita yuku dinya tsanu, e kotanitra tsatsi yani tsheshi yuku dinya tsanu.
- 25 Tsi tsasomeshityia tsheshi tayasomeshita me n'takunu, e kotanitra yani tsheshi me n'takunu, washu tsa. Tsi katrutya yani tsheshi tsaniatya, Beelzebub, hatsushu katrutya ai gaatrutyishi taa nyeniatsiumasa. Emi heya bami kutrayiputsani, she tsi haityi tsiutyina-shityishi niutyinatyitwaniku, e tsi haityi tsiushikuma-shityishi niutonimiku. Tsi haityi shrawapenu, tsamishityitsi dyika, mashra tshesha dyika nipenakutrusa, e tsi haityi kutrayappe dyika nu kutrakanitya,
- 28 nuwakatsitya-kutrusa katrutya dinyi si dyu. E tsini kowawatrutyatyishi e tsatsi itye maiani nautakunu bashrumi putrayiputsanisha, she eku etyu shruwatyamu-tse dyika nu tsini e maiani shikaewa itye sutsi nitrakunishi putrayiputsani. Gao tsa dyue drugasha gayatanishi ishike sentawa shiya tyuyatani? E kutra-naishityia tsatsi gatyumishi, tsatsi ishike puta nutsatya nu niutrachukunu. Etyu emi kutraya-nushika hadrani
- 31 sai tsiuishityitani; emi heya bami chuputsanishi; mina yuku kutrayatra, tsatsi hemaku naoya gayatanishi tsaaputya. Emi heya hau tsi hano dyika yani kaakaisunu, hinome niya, nutyumu sa-naishityia Kaunamatsi gaapishi dyika yani naakai-si. Etyu hau tsi hano dyika yani kanatani, hinome tsatsi shityinimanu, nutyumu sa-naishityia Kaunamatsi gaapishi dyika yani tsatsi niunimatratyu-shikunu.
- 34 Bami chaatrutsityishityia tui hatsi dyu bishityi tsheshi tuwe utyi niya hawe tsuseshi; tsatsi bishityi tsheshi etyu ishipari utyi niya hawe tsu-si. She hawe tsuseshi wa hatrutsai ga-naishityia dyika shruinisa, e makutsa ganaia dyika shruinisa, e biya ga-tsipiya dyika shruinisa neyatrasinishi niya. She hano tsiuyanishetyishi noyu
- 36 gaama si n'taapukusa. Hautsi ga-naishityia ku ga-naia
- 37 mina kuutsimunu, tsatsi hemaku shityiutsimunu, tsatsi hinome dyika yatra tsanu; e hautsi ga-mutyi ku ga-

- maku mina kuutsimunu, tsatsi hemaku shityiutsimunu,
- 38 tsatsi hinome dyika yatra tsanu. E hautsi ga-shukuchatsi tsatsi dyu kayakunishi hinome hamashu tsukunu,
- 39 tsatsi hinome dyika yatra tsanu. Hautsi ga-iani kouiyaanu, tu niutratsiuma; etyu hautsi ga-iani su-tsi niya tu nitrakunu, emi niyainaku. Hautsi kutrushutsanu, tsika hinome shikushutsa; e hautsi hinome shikushutsanu, tsika kushutsa tuwe shikukuyanishi. Hautsi prophet E-gashi niya prophet kushutsanu, prophet ga-uyaani nyeeyaawanaku; e hautsi kuitonimishi hatrutsai kuitonimishi hatrutsai E-gashi niya kushutsanu, kuitonimishi hatrutsai ga-uyaani nyeeyaawanaku. E hautsi umatsi E-gashi niya tsitsi gawaishitaya tu ishike maka ishike towa iatratyaimishi gayashikatakunu, kaimatsi shrayitsakuiya mame tsatsi ga-uyaani tu niutratsiumanu.

11 She e-chaetra Jesus heme gayayanikuiyani katsi dyue tsitra ga-umatsityaimishi, ai si yuku tsutyu ga-tsaashityitrashi dyu ayasomeshitani e ukatsani.

- 2 Shru John ayatsitani tyaachupi chaka Christo kutanitrani, gayisomeshitanishi hake tyiyata, e
- 3 emi niya e-tyanata: Hishrome emi tyuta hawe tsuniku-
- 4 nishi, ku ishika niyukai-tutrusa? E Jesus tayipeyuta e tayitsakuiya: Hake tyeema e John pupena tsi
- 5 kutraakanishi, e tsi shrukachanatyishi; tsa tsayakashityishishi mashra si tsiwautra, kuwakusutsitanishi si tsekkuiya, leper tsiwawasatyishi tsiwakayawa, e peshatsaaputyishi si ga-kani, e kaawishi si dyu tsayapatyunawa, e amome tsaaputyishi tawa-mani tsayawakatsanitta. E gauyeetyi hautsi hinome niya tsatsi hama anachupatsi tsityitanu.
- 7 Shru towa ai si yuku tsekkuiya ni, Jesus, John niya tsi hanowishi dyika shru e-chatsa: Tsi haityi shrume-kumenyee tsatdyau dyika ye hake kutyeeku? Achuwa natrani niya tsiwitsiwukutsishi ta? Hatrutsai washratsi kowakunishi ta? Shrukunimasa washratsi kowakunishi

9 rai ga-ama ye ga-atru. She etyu tsekoma hake kutyekkuiya, prophet ukachani niya? Ha, shrayitsakuiya, mame mina prophet si yuku. Towa emi tsa he niya tsidyatranishi:

Mu, sa-upeseyitanishi kutruwawawi ai yuku yani nikuya-si, hewa kutra-hiyani hishrome ai yani haku nitraku.

11 Kaimatsi shrayitsakuiya, ku dyika tsiianishi kotaa, Baptisma John tseyatynaimishi hatrutsai tsatsi hau kumunu; she etyu tu etse drutsishunishi Kaunamatsi itye-tseshra gaapishi John tsiyatynaimi. She John gaapishi si yuku wai hema Kaunamatsi itye-tseshra tsipaputramuse, e tsipaputramusetyishi kauiyaanase. She sai tsi prophets e utsitokaishi John gaapishi hema tayasomeshita. E tsi noyu e kutrusatyi shrauiyaanisetiya, towa hawe tsunikunishi Elijah. Hautsi akani tsipetyishra, peka. She etyu wai hano tsi haityi kushigayu niyatra-si? Emi hawe tsishityiatyishishra ye tseemishi e mika gowapeotsatyiatanishi iatra me; wa tyanatasu: Shraiwashipiurutsanitta, e tsatsi shratsetyiatya; shratanatyi, e tsatsi si ayama-kutrusatya. She emi John tsutyu e tsatsi chupbeokuiya e tsatsi tyushikatyi-kuiyanu, shrue e tyatsia: Chanatyaya. Etyu hano ga-mutyi hawe tsutyu kupbeokuiyani e kushikatyi-kuiyani, shrue tyatsia: Mu, kaotani hatrutsai e wino kushikatyikuiya, kaukitaukuiyana e kokitsityia gaiwakini. Shrami utonimi tsukachanishi gaitani niya tsi-tyiemi-tyita.

20 Shrue shra tsaashityitra, ai hawe nu mina yuku imi ma ishatsini e-chaetra, shrue shru kuwauishikuiya ni tyuwanamatsita, she tsatsi chuwawataipunaimetya:

21 Eiya kuta, Chorazin! Eiya kuta, Bethsaida! She tsi hishrome we nu shaashityitranishi e-chaetranishi imi ma ishatsini Tyre e Sidon ai dyu tsitanitranishra, mame mishru hama haikani wakuni e mishai niya kowawataipunaime. She etyu shrayitsakuiya, ayatani tsaashityi-tratyuni hishrome hemaku tsatsi Tyre e Sidon dyika gayutaya nyeetranikunu. E trutyu Capernaum shaa-

shityitra, kowatyuma hemaku dinyaa nyeetranatyu? Tsa, sai si nu nyeeyatsinaime-shru, she tsi Sodom dyika dyu hishrome dyika dyu hemaku imi ma ishatsini e-kaetranatyunu, emi wai menashru nyeeshityitruku.

24 Etyu shrayitsakuiya, ayatani tsaashityi-tratyuni, hishrome hemaku tsatsi Sodom ga-hatsi dyika gayutaya nyeetranikunu.

25 Emi eyu Jesus tyayipeyutawa e chatsa: Naishityia, Kaunamatsi e gaishibishra dyu Huchani kutyeshi, shraunamatyi sai tsi towa kuwasu e kutonimasatyishi shruwawakucha, e owaka dyika tyiemi shraiwastrani.

26 Ha, Naishityia, she emi taa mame anye-shru.

27 Sai tsi sa-naishityia si shikaou; e tsatsi hau kunima Umutyi, she nowe Naishityia, e tsatsi hau kunima Naishityia, she nowe Umutyi e hau tsi dyika ye Umutyi e-kunu mashra nitrakunu. Sai shruwatanitranishi e kutruwagayutaya tuwe tyekkuma, e nyeyauanatra-shrawatruma. Sa-yaityuishityi chuwatyityinami e chuwatyumitra, hinome si, she shrana suta, e se-winoshika dyika amoma suta; shrue kutraya-maiani

28 dyika uanatrani niyainawa-kutrusa. She sa-yaityuishityi tsatsi kaosayu, e sa-uipatyuiyani shapa tsi.

29

12 Emi eyue, uanatrani tsaashika tse Jesus tsaishra ye tyiupusu; E gaisomeshitanishi tyayitramashito, shrue ashvani chuwawaityityia e tyaape. She Parasai hano towa kukachanaty tania: Mu, kutraisomeshitanishi e-tsitrantatyishi wa emi e uanatrani tsaashityi e-utrani tsatsi shrami tsanu. She etyu tyayitsakuiya: Tsatsi tsidyatranishi trukachana, tsi kui tsitrantishi David, tsiyamashityi, e hawe kaiwatyisetyishi, gowa Iusi katrutya ye kupunishi e tsiyaityanishi semita kupbe; etyu towa kupbewi tsatsi itye tanu, ku kaiwatyisetyishi, etyu nowe tutatsityitra. Ku utsitokaii tsatsi na trukachana, gowa uanatrani tsaashityi tsi-tyumi-katrutya gaya tutatsityitra uanatrani tsaashika kukitsityiatyisu, e tsatsi tsiwatsikunu? She e-shrayitsakuiya, tsiyumi-katrutya yuku tseyatynaimishi tui gaa.

- 7 Etyu tsi shrutonimasatyanu tsi towa mani tseshi, Ayatyuityi shikutsipu, e tsatsi uyaityani, tsa-kokitsanatyishi gai tsatsi kukitsi-nyiwatyaina-kutrusatyanu.
- 8 She hano ga-mutyi uanatrani tsaashika dyika dyu huchani tsa.
- 9 Shrue ai si yuku tsutsi gaya-aiwatyami-gaya ye tyiupu. She Mu, ishikaya kamashityi sai tyepanawani hatrutsai ai tya. E shrue tyiupetawa, tyanata: Uanatrani tsaashityi itye ta ayatsaipunaimi? heya niyewaitawanatyu. She e-tyayitsakuiya: Haityi hau ye emi tsi ishike kanieru gatyashra, e tsi chitye uanatrani tsaashityi gotrotyishra nu kutrachanu, tsatsi e-nityatyu e si dyu niukutyu? Hatsumaku hano kanieru dyika mina yuku yatra tsa! Emi heya itye e-tsa uanatrani tsaashityi tsi tawa utyitani. Shrue hatrutsai e-tatsakuiya: Shramashityi hau chuta! Shrue hau chauta, she ishika kamashityi me si heka tyiutra. Shrue Parasai hano hake si tyemu chayiwatyami, kutsi niya, gowa niyumutyisana-tsiumasatyishi.
- 15 She etyu Jesus kaotyumi, ai si yuku tsutyu, e mame tsi hanowishi hamashu shichakuiya, e emi sai tyiwatsaipunai, e shrami tyayayanikuiya tsatsi tsi tyiemi nitratsiumasatyishi, emi heya prophet tseshi Isaiah e-katsanishi e-naitraku, tyanata:
- 18 Mu, Sa-tanitrani, sa-utatawi si-utsimunishi, se-winoshika niya anye shikuushranishi, Sa-tsatsi ai dyu nityi-si, shrue tsiuitawanishi niya tawa-mani nanami hano dyika ye naupeseku.
- 19 Wa tsatsi neyayetsanikunu, e tsatsi niusheetitakunu, e tsatsi hautsi hano ga-tsanishi hiyani ye nikakunu. Tsiunatyumenishi trukawa tsatsi naokayutsakunu, e korarakanishi flax kiwa-tseshi tsatsi e-nyenoshitoty, menashru ai shra tsiuitawanishi tsiyatani ushiawishi hemaku dyika;
- 21 e E-gashi niya nanami hano nutrayeetsishikusa.
- 22 Shrue ganatyaya tsityatyishi, tsatsi tyikashityi e tsatsi katanu tauyutsemitta, e si tyiutsaipunawa, hemaku tsatsi katanishi si chatsa e si tyikashityi.

- 23 She sai hano chaaputsa e tyana: Tsa towa David gamutyi ta? She etyu Parasai hano kakanityi tyana: Towa hatrutsai tsatsi ganatyaya kutyikusu, tu heme ganatyaya ga-huchani Beelzebub niya. She Jesus gaatsityishityiatyishi kutoni, tayitsakuiya: Sai heme itye-tseshra kuwayakuicha e kayayetsanishratya sai tu naitraku; e sai tsaashityitra e katrutya kuwayakuicha tsatsi itye nichanikunu. E tsika tsi shruwatyamu kutyikunu shruwatyamu noyu kaokuicha, shrue gowa ga-itye-tseshra itye nichaniku? She tsi hinome Beelzebub niya ganatyaya si-utyikusu, hautsi niya kutra-iatratyaimishi kutyikuse? Emi heya hewa niwatana-kutruwatrumasa. She etyu tsi hinome Iusi ga-maianishi dyia ganatyaya si-utyikusu, menashru Iusi ga-itye-tseshra hau shaatsi. Kume etyu gowa tsishatsishi hatrutsai gaama hau tuwe itye niupuku, e gaishimishi sutsi niutraku, tsi tsa tsaya tsishatsishi hatrutsai tsiupashityanittya, e shrue menashru gaama sutsi nitraku. Hautsi tsatsi su-tyisityuka, wewisa tsa; e hautsi tsatsi hinome dyika tsiwatyasunu kushramatsita. Emi heya shrayitsakuiya, sai ukitsishi e sai sutsime atsani, hano dyika nyewataipunaimiku, she etyu Kukimuni Maiani dyika sutsime atsani tsatsi nyewataipunaimikunu. E hautsi hano ga-mutyi dyika sutsime katanu nyewataipunaimiku, etyu hautsi Kukimuni Maiani dyika sutsime katanu, tsatsi nyewataipunaimikunu, tsatsi tui gaishibishra dyu ku tsatsi ishika gaishibishra dyu. Haityi-puta kiwa tsishi tawa pitrana e ga-hitrani tawa pitrana, ku kiwa tsishi sutsi pitrana e ga-hitrani sutsi pitrana. She kiwa tsishi ga-hitrani niya tsaitrunimi. Shruwi ga-iatratyaimishi! Sutsi kutaapu, gowa itye tawa atsani kutratsia? She winoshika kumunishi dyika si tsiika katasu. Tawa hatrutsai tawa tsityumishi dyika si tawa tseshi hawe tsitra; e sutsi hatrutsai sutsi tsityumishi dyika si sutsi tseshi hawe tsitra. She e-shrayitsakuiya, hano natratsia-kusatyishi sai tume utsetyitani dyika, ayatani tsaashityi-tratyuni tyiemi nitrana-kusa. She

kutra-tseni niya tawa nyeeyainawa-shru, e kutra-tseni niya sutsi nyeeyainawa-shru.

- 38 Shrue haityi tsidyatranikusana e Parasai hano tyipeyutawani tyana: Tsayasomeeshita, Hishrome
- 39 dyika si utyiemi-trani ukachani shikuwatsipu. She tyayipeyutawa tyayitsakuiya: Sutsime e tuwe gaya-
uiaityia kaatonimishi utyiemi-trani tsiyaipatyikuiyana, etyu tsatsi tsi ishika utyiemi-trani nyeyaapiku, tu heme
- 40 prophet tseshi Jonah ga-utyemi-trani. She Jonah chami sai e chami bishu shikaashi kunacha gaachu, emi taa hano ga-mutyi chami sai e chami bishu hatsi
- 41 ga-winoshika nichuku. Ninevah-me hatrutsai, ayatani tsaashityi-tratyuni, towa kaatonimishi kowataatsi dyu nutraashrati-kusa, e sutsi nyeeyainawa-kusa; she Jonah kokatsetanishi dyika kowataipunaima; e Mu, mame Jonah tseyatinimi tui ga. Wa ai ku-me kuitsa-huchani, ayatani tsaashityi-tratyuni kaatonimishi kotaa-tse dyu nitatyiku e sutsi niyainaku, she wa tiye tshesha si tsutyu, Solomon ga-somenishi nikakunishi niya; etyu Mu, mame Solomon tseyatinimi tui ga.
- 43 She etyu hama adyema tseshi maiani hano dyika si kumuni tsiipanishra dyika ye gaanitrutyaya, uanatrani tsiyaipatyikuiya e tsatsi tsiyainaukuiya. Shrue e-katsa: Sa-ama ye hake si tsunisi, ai si si-umunishra, e hau si tsaatsini tsiyainaukuiya tu tsa, tsayashikani e tsiushityemi tsi. Shrue hake si tsutyuni maityana maiani, mina mame sutsime tsaaputyishi tyayatrutse, e hau tseepuni ai gaatru, shrue he hatrutsai, chai me, mameshru sutsi tyitrani. Emi taa tsika towa sutsi kaatonimishi n'taapukusa.
- 46 Mi na tsi hanowi gayiminatyikuiyani, Mu, ga-naia e ga-tyumutyaimishi wa ai chaatya si tyeechanishi, tyiwatsipu minatakusatyishi. She hawe taatsakuiya: Mu, kutra-naia e kutra-tyumutyaimishi wa ai chaatya si tseechanishi, tsiwatsipu nyiminata-kutrumasatyishi.
- 48 She etyu tyipeyuta, tsiupenishi taatsakuiya: Hau sa-naia? e hau sa-tyumutyai? Shrue kamashityi chaotta
- 49 gaisomeshitanishi dyika ye wa, e e-chatsa: Mu, Sa-naia

- 50 e sa-tyumutyaimishi! She hautsi sa-naishityia Kaunamatsi gaapishi ga-uwayani e-tsitrano, emi wa sa-tyumu e sa-kuitra e sa-naia tsa.

- 13 Emi eyu tsaashityi Jesus katrutya ai si kumuni
- 2 kutaa-butru ai si chukuiya. E mame tsi hanowishi ai shriena chayiwatyau, shrue kanue dyu tyiupu e ai si nu chukuiya, e sai tsi hanowishi hatsi si dyu tyeechanishi.
- 3 E shrue uwasenishi niya naoya tsi tyiwape, tyanata:
- 4 Mu, Kautyisu kautyime; shrue kautyimi, hiyani ye nu hatsue chuwisha; shrue gayatanishi hawe tyeeke e tyaaape. Mika, yaoni tshesha dyika ye dyu chuwisha; e tsa ai dyu naoya yaai tshesha, shrue shru dyu tyiemu, she tsatsi yaai chaapichu. Shrue hawe dyu oshratra kumuni, tayashitamuchatsa e sai tayapanito, she tsatsi tyawawaitranishitya. E mika, haika naaishu ye nu petya; shrue haika dyu tyeeemu, e haika dinya tyiwacha.
- 8 Etyu mika, tawa hatsi dyika ye nu chuwisha; shrue tawa hitrani chaetra, hatsue katsi-wa-katsi yuku, mika shichisu-wa-katsi yuku, e mika chamiya-katsi yuku.
- 9 Hautsi akani tsipetyishra, peka.
- 10 She umatsityaimishi hawe tyeeke e tania: Tsekoma
- 11 uwaseni niya shrayaminatyikuiya? E tyayipeyuta e tyayitsakuiya: She kutra-ayaapi utonimi Kaunamatsi itye-tshesha tsi gowa tsiushikumashityishi, etyu tsatsi weyetsayaapityani. She hautsi gaashra, niyeepiku, shrue mame naoya naku; etyu hautsi tsa gaashranu, bato tsi chaashra, si niyesatyutsitsaomasa. Emi heya uwaseni niya seyiminatyikuiya; she bato kuukachanatyani, tsatsi kuukachanatyani, e bato kakanatyani, tsatsi kakanatyani ku tsatsi kuwittawityiatyanu. E emi niya prophet tseshi Isaiah e-katsanishi weya hano e-kaetra. Tyanata:

- 15 Akani niya nutrakase-kutrusa e tsatsi niwittawana-kutrusatya; e ukachani niya niukachase-kutrusa, e tsatsi mashra nuwaotra-kutruwatru-manu. She towa hano gaya-winoshika gayayu, e tsayappe pesha me tsaa, e gaya-ana tsechaini-

- tyishi, tsi shru tsi gaya-ana niya niukachana-kusatyishi, e tsayappe niya nitrakani-kusatyishi, e gaya-winoshika niya niwittawana-kusatyishi, shrue si kayaishigutrai e shrani niyatra-si.
- 16 Etyu gaueetyishi kutraya-ana, she kuukachanikuiya,
17 e kutrayappe she gakase. She kaimatsi shrayitsakuiya, naoya prophets e kuwautonimishi tsi shruukachanatyishi tsiwatsipu ukachani, etyu tsatsi kuukachanatyia; e tsi kutra-kanityishi tsiwatsipu akani, etyu tsatsi gakanyetya.
- 18 Shrue, trakani kautyisu niya uwaseni. Kaunamatsi
19 itye-tseshra dyika mani hautsi gakanu, e tsatsi kuwittawanu, sutsime tseshe hau tsuku, shrue ga-winoshika naya tsiutyimishi tsiusatyutsa. Towa emi tsa, hiyani ishikayashu dyika ye tsiutyimishi. E yaoni-tseshra dyika ye dyu tsiutyimishi, emi tsa, mani gakashi e tu haikamiku tsiuishityia ni kayaokuiya, etyu noyu tsatsi ga-wawaitranishra, she etyu mina hatsuma kaushigitsa, shrue towa mani kutsi niya tsaayatsitsinaimetyanu ku tsaaityityiatyanu, tu haikamiku tsiupakutsani. E haika naaishu ye nu tsiutyimishi, emi towa mani gaku, etyu tsaashityama ga-utsityishitanishi e tseyatyimi-ashe gawitutranihi mani kuwaketaya e shrue emi tsatsi hitrani tsiutranu. Etyu tawa hatsi dyika ye tsiutyimishi, emi towa mani gaku e kuwittawita; kaimatsi emi hitrani e tsiutra e tsiyakamisu, hatsue katsi-wa-katsi yuku, mika shichisu-wa-katsi yuku, e mika chamiyakatsi yuku.
- 24 Tsika na uwaseni hawe tyaiwatrani tyanata: Kaunamatsi itye-tseshra tsa, hatrutsai ga-hatsi dyika
25 ye tawa kawitsi tsiutyimishi kushigayu. Etyu hano tseepaityi, tsiuyetsanishi hawe tsutyu e ashvani dyika
26 ye hiuyupu chautyi, e shrue yuku si tsutyu. E shrue shru, ashvani kiwa tseshe hawe dyu tsemuni e hitrani
27 kaetrani, hiuyupu tsika tyiemi chaetra. Shrue yani tseshe ga-tanitranyaimishi hawe tyeeeku, tania: Yani tseshe, Tsatsi tawa kawitsi kutraishra trautyi? Shrue
28 hatyi si hiuyupu tseeku? She tyayitsakuiya: Tsayaye-

- tsanishi hano towa e-tyitra. Shrue ga-tanitranyaimishi tania: Kume e-tru towa nyeyatawa-sutrusatyishi? Etyu e-chatsa: Tsa, Tsi shru tsi hiuyupu dyu shruwanutsanatyi, ashvani gayatsi dyu niwanutsana-kutrusa.
- 30 Paiwaheetsani shikaewa uitonimi uwaityani kaetrani hema, she uwaityani tsaashityi, kowawaityityia niyetsakuiya-si hiuyupu tsaya payatawa e pipatyame niutakaniku ni; etyu ashvani sa-ushitani ye niushitana-kutrusa.
- 31 Tsika ishika uwaseni hawe tyaiwatrani tyanata: Kaunamatsi itye-tseshra waku kawitsi kushigayu. Towa kawitsi hano tsitawi ga-hatsi dyu kaautyima.
- 32 Kaimatsi kawitsi kotaa tse, towa mame yuku drusishu, she etyu shru kitonimi, mame mina yuku tsiichu kiwa kaetyita, hemaku howaka dyika ye gayatanishi hawe tsekkuiyata gatsashityuma ye dyu kaetyita.
- 33 Tsika ishika uwaseni tyiwappe: Kaunamatsi itye-tseshra kashratyi kushigayu. Emi towa hau ku chami tsiuityimi inawi dyika nu tyuishikumasha menashru sai kashratyitratyini.
- 34 Sai tsi towa Jesus tsi hanowishi dyika uwaseni niya gayimina; etyu tsi tsa uwaseni niyaka tsatsi tyayiminityikuiya, emi e-naitrakunishi prophet e-katsanishi niyaka tyanata:
- Siika nieta-si, uwaseni niya nyemashra-si tsi tsiuishikumashityishi tsaya hama tse si yuku.
- 36 E shrue tu tyayatra tsi hanowishi, e katrutya ye tyupu, kaumatsiyaimishi hawe tyeeeku tyaana: Tyiemi gayiawatrani tsaishra ye hiuyupu uwaseni. Shrue tyayipeyuta e-chatsa: Tawa kawitsi kautyisu, hano gamutyi tsa; e tsaishra, gaishibishra tsa; e tawa kawitsi, emi wa Kaunamatsi itye-tseshra ga-iatrai; e hiuyupu,
39 emi wa sutsime tseshe ga-iatratyia; e kautyimishi tsayayetsanishi, emi wa shruwatyanu tsa; e uwaityani kaetranihi gaishibishra kuinaottani tsa; e kowawaityityia, emi lusi ga-upeseyityaimishi tsaapu. Emi taa hiuyupu dyu tsiukuiyawishi e tsipashi niya tsiutakani,
41 emi taa n'tyeeeku gaishibishra kuinaottani. Hano ga-

- mutyi ga-upseyityaimishi neyayataku, e ga-itye-
 42 tseshra si sai tsi ayapakashityi e sutsime tsityitanatyishi
 nyiwayatemekusa, e tsipashishra ye nu niyakuiyawiku,
 43 emi ai niyetyikuiyaniku e hachani nyeyiushikunutsita-
 niku. Emi shrue shrami tsaaputyishi oshratra me ga-
 naishityiashi ga-itye-tseshra dyika nowashityemitsita-
 kusa. Hautsi akani tsipetyishra, peka.
- 44 Kaunamatsi itye-tseshra tsaisira dyika ye tsiushi-
 kumashityishi tsityumi tsheshi ma tse. Towa, hatrutsai
 tsiyainawi tsiushikumashityi, shrue tsiuishityiani tsuku
 e shrue sai tsi gaishi tsisha, shrue emi tsaisira tynatta.
- 45 E tsika na, Kaunamatsi itye-tseshra tsityumi apuna
 46 kowatyaipatyikuiya tsishita kushigayu. Towa, ishike
 naoya kayamishi apuna tsiyainaku tsuku, e shrue sai
 tsi gaishi tsisha e towa tsinatta.
- 47 Tsika na, Kaunamatsi itye-tseshra, shikaashi-
 uwani kunapatyishi kutaa dyika nu tsaawishi, e shrue
 48 sai kuishitye shrama tsiuwatyamishi kushigayu. Towa
 guta ni kutaa-butru hau dyu nutsana, e ai si nu chaata,
 shrue tawa tsheshi dyuni dyika nu tyiwayatami, etyu
 49 sutsi tsheshi tyaokuiyawii. Emi taa gaishibishra kui-
 naottani n'taku. Kaunamatsi ga-upeseyityaimishi
 hawe nityeekusa, shrue sutsi tsheshi tawa tsheshi naaishu
 50 si nyeyatawikusa; e shrue tsipashrumishra ye nu
 niyakuiyawikusa, emi ai niyetyikuiyaniku e hachani
 nyeyiushikunutsitaniku.
- 51 Sai tsi towa truwawittawana? E tania: Ha.
 52 Shrue tyayitsakuiya: Emi heya sai tsidyatranikusu,
 Kaunamatsi itye-tseshra niya tsi e-tsaitranatyanu,
 katrutya yani tsheshi kushigayu. Towa tsityumishi
 gashi natsi tsheshi e tsawini tsheshi hawe n'tyekkuiya.
- 53 Shrue emi e-chaetra, Jesus towa uwaseni kaunao-
 54 ttani, ai yuku si tsutyu. E shrue ai hatsi tsiianishra hau
 si taatsi, e gaya-ai watyami-gaya ye tyayisomeshita, emi
 heya chaaputsa e tyaana: Hatyi si towa hatrutsai towa
 55 utonimi e towa imi ma ishatsini kayaou? Kume tsa
 towa kaatraya cha-mutyi? Kume tsa ga-naia Mary
 tania? E ga-tyumutyaimishi James e Joseph e Simon

- 56 e Judas? E ga-kuitratyaimishi, wa gao tsa sai tuwe
 tyeekuiya? kume shrue hatyi si towa hatrutsai towa sai
 57 tsi kayaou? E chuwatyanatyanu etyu Jesus tyayitsa-
 kuiya: Tsi tsa noyu hatsi e noyu gaama dyika tsanu
 58 prophet tsheshi tsatsi tsi tsatsi tsaumasatyanu. E shrue
 tsatsi naoya imi ma ishatsini ai e-tsitrano, she tsatsi
 tsiwahimatyishi niya.

- 14 Emi eyu tsaashityi Herod dapopo, Jesus
 2 niya upetani chaka, e shrue gautanitranyaimishi
 tayitsakuiya: Towa emi Baptisuma John tsa. Wa
 ushitoni si dyu tyipatyu, she emi towaya towa imi
 3 ma ishatsini gautseshruwa. She Herod John tyitya, e
 tyiupashityani, e utsitani tyipunaii, ga-tyumu Philip
 4 ga-okui Herodias kutsi niya. She John e taatsakuiya:
 5 Tsatsi itye naokui-shrunu. She etyu John naotakuni, tsi
 hanowishi tyiputsana, she John prophet me taayukaii.
 6 Etyu shrue shru Herod tsiianishi tsiutsaashityishi
 kaetra ni, Herodias ga-maku ai suna nu chitseta, e
 7 shrue Herod tyiuanuyutsa, e emi heya kaimatsi akaesu
 niya tyiushrani tsi haityi kuwitaanishi niyuaanityuma.
 8 E mishru ga-naia tyiyanikuiyani, shrue chuwittaa
 tyanata: Tuwe tui waishitani si dyu Baptisuma John
 9 ga-nushika kutyi. E rai tsheshi tsityishityityu, she etyu
 kaimatsi ka-akaesunishi niya, e ai haupa kauyatawa-
 10 tyishi kuwatrutsi niya, chuwaya utyityi. E hake tyaya-
 yata e John ai ayatsitani dyika tyunushigaitowana;
 11 shrue ga-nushika waishitani si dyu gaapi hawe taayu-
 tsee e maku tsheshi taatyita. Shrue ga-naia dyika ye
 12 tyiyutse. She ga-umatsityaimishi hawe tyeeeku e shumu
 dyu kayaawatya, e tyityaitsime, e shrue hake tyeeeku
 Jesus tyupena.
- 13 She Jesus kakani, kanue niya ai si yuku tsutyu, tu
 tseshra ye. E tsi hanowishi kakanatyi, tseekuiyani
 14 hamashu tyeeeku, tsaashityitranishi si. E Jesus hawe
 tsutyu e mame tsi hanowishi tyiwakacha, e amo-
 tyiwatrutsiyishita, shrue ga-tsiwawasatyishi tyuwa-
 15 tsaipunaii. Shrue shapuka ni kaetrani, ga-umatsityai-

mishi hawe tyeeeku tyaana: Tui tu tseshra tsa, e tsiiami; tsi hanowishi yuku si payitrawa tsaashityitra ye si
 16 n'tyeekukusatyi upbewi n'tranatanakusatyi. Etyu
 Jesus tyayitsakuiya: Tsatsi sekka n'tyeekukusatya;
 17 payatyishana. Shrue tania: Tu heme taama semita e
 18 dyue shikaashi tui sutraishimi. She e-chatsa: Tuwe
 19 kuiyashemitta. Shrue tsi hanowishi mushru dyika si
 nu ukuiyani tyayayanikuiya, shrue taama semita e
 dyue shikaashi chuiyataya, e kowatyuma ye dyu
 tyauyukai semita tsityu-tyayatra, shrue chautsayutsa e
 ga-umatsityaimishi tyayawayaty, shrue ga-umatsi-
 tyaimishi tsi hanowishi dyika ye tyaiwayatyita.
 20 She sai haupa tyaape, e chatrukaii; shrue kaatyumishi
 tsaayutseshi dyu chuwatana, katsi dyue tsitra kanashitu
 21 gutana. E towa tyaapbetyishi haiyitsi taama miri
 hatrutsai, e hau yuwi kuiyawitra e iatra.
 22 Shrue tu haikamiku Jesus ga-umatsityaimishi
 tyiwakashitaya kanue dyu uyupuni e yuku yani
 wewisa ye wa utsutsi, menashru noyu tsi hanowishi ai
 23 yuku si gaitrawani. She tsi hanowishi ai si yuku
 gaitrawani, shrue menashru kotyu ye dyu nowe tsutyu,
 amoma tyitra ni, e shapuka ni e-kaetrani, nowe ai tya.
 24 Etyu kanue shrue shru tsitsi dyika suna ai tya, kuwai-
 dashikatsita niya ganashiyani e-tayatyita, she hakuma
 25 wa natrani tyeeshitaya. E ha niya shamuka ni, Jesus
 tsitsi dyika dyu chaanitrutyaya hawe tyiwa-tsuku.
 26 E kaumatsityaimishi tsitsi dyika dyu ga-ani tsiukacha-
 natyi, chaaputsa tyaana: Wa ganatyaya tsa. E kaapu-
 tsityiatyi tyaata. Etyu tu haikamiku Jesus tyayimina
 27 tyanata: Truwauishityiani; tu hinome suta; bami
 28 traiwatyushu. Shrue Peter tyipeyuta taatsakuiya:
 Huchani, Tsi emi kutanu, tsitsi dyika dyu hishrome
 29 dyika hau utsutsi kuppeotsa. She e-chatsa: Hawe ima.
 She Peter kanue si nu tyitya, e Jesus ye utsutsi niya
 30 tsitsi dyika dyu chaanitrutyaya. She etyu natrani
 kuukachani tyiutyushu nitratyu, shrue shru nuka
 31 tyupusu ni tyiushigaitsa tyanata: Huchani, Kuitragu. E
 tu haikamiku Jesus kamashityi niya hau chaotta e

tyitya e taatsakuiya: Koimi uhimatyi kuta! Tsekoma
 32 tsa kutruhimatya? Shrue kanue si dyu gaapuni natrani
 33 chutyatsi. Shrue kanue dyika dyu tseeputyishi chaashi-
 totrumi tyanata: Kaimatsi lusi ga-mutyi kuta.
 34 E shrue tsitsi kowauchapuni, Gennesaret hatsi
 35 tseshra hau tyeetyu. E ai tseemishi hatrutsai tsiwita-
 wanaty, sai ai shriena tyiyatana, e sai tsiwawasatyishi
 36 hau tawatrutsemitta. E tyiuitanakuinyana tu heme etse
 ga-wakuni hau si dyu kaosityitsishi niupakatsana-
 kusatyishi, she sai heme tsiupakatsanatyishi sai si tawa
 tayatra.
 15 She Jerusalem si Parasai hano e tsidyatranikusana
 2 na Jesus dyika hau tyeeeku tyaana: Tsi haiyi niya
 shraisomeshitanishi tsaya tsaaputyishi hama tse si tsa-
 yukaityishi tu tyitranan? She semita gaapbenaty tsatsi
 3 kamawaishityisetya. Shrue tyaipeyuta tyanata: Tsi
 haiyi shi niya trutyumu kutra-tsayukaityishi niya lusi
 4 ga-uwayani tu shitrana? She lusi kanata,
 Tsityumi paaitra kutra-naishityia e kutra-naia;
 e tsika, Hautsi ga-naishityia e ga-naia dyika
 sutsime e-katsanu, piushito.
 5 She etyu e-kutratsiatyeta, Hautsi ga-naishityia ku ga-
 naia e-tsatsakuiya, Tsi sashi niutyawa-kutrumanishi
 6 mishru tsayaapini, tsatsi sekka ga-naishityia ku ga-
 naia tsityu-nutranikunu. Shrue lusi ga-uwayani tu
 7 shitrana, kutra-tsayukaityishi niya. Gayauitutyityia
 kutaaputyishi, Shrami Isaiiah shratrutsi niya e-chatsa,
 tyanata:
 8 Towa hano tsaya-ka niya tsityu-shikuityityia etyu
 gaya-winoshika hinome dyika yuku tiye ee-tsaapu.
 9 Etyu shikutyumityitrawanatyikuiyatyishi tum-
 tsa, hano ga-uyukaityishi uwayanishi niya
 gayasomeshityiata.
 10 Shrue tsi hanowishi tyiwapeotsa e tyayitsakuiya:
 11 Tra-kani e puitawana, Tsatsi tsiika ye nu kupunishi hano
 tsatsi chitye e-tsitrano, etyu tsiika si kumunishi, towa
 12 hano tsatsi chitye tsityita. Shrue ga-umatsityaimishi
 hawe tyeeeku tania: Towa shratsanishi Parasai hano

- 13 kakanaty tsiwanatyumeni traotyi? Etyu tyaipeyuta tyanata: Sai heme tsiutyimi, tsi kaunamatsi gaapishi sa-naishityia tsatsi kautyinu, si dyu niusityaniku.
- 14 Tu payatrana. Tsatsi tsayakashityishra gayatrutseyatani tsaapu. E tsi tsa-tsikashityishi tsa-tsikashityishi tsishityiyakunu, gotrotyishra nu ishikawa n'trautrachakuu. She Peter tyipeyuta tyanata: Towa uwase ni tyiemi gaiwatrani. She Jesus e-tyayitsakuiya: Gao trutyumu tsatsi na truwittawanatya? Tsatsi na tyiemi trutruwautra, tsi haityitsi tsiika ye nu kupunishi kunacha ye nu kupusu, e shrue uishityupeyi ye nu tsatyitruui? She etyu haityitsi tsiika si tseemunishi winoshika dyika si tseemusu. Towa hano tsa chitye tsayatyita. She winoshika si dyu hawe tseemusu adyema utsityishitani, ayawani, ayauiani, adyema e-utrani, uchawani, tsa kaimatsi shityishityiku utyitani, sutsime utsetayii; sai tsi towa hano tsa chitye tsayatyita, etyu tsatsi kaamawaishityimi kupbenishi, tsatsi towaya hano tsa chitye e-tsiutyitanu.
- 21 She Jesus ai si yuku chutata, Tyre e Sidon ai shriena gaa-hatsi ye tsutyu. E Mu, Kana-me ku, towa hatsi dyika si tyumu chaatyikuiya tyanatani: Kutyuityikuiya, Huchani, David ga-mutyi; sa-maku kaosa me ganatyaya tsityatyi. Etyu tsatsi tyipeyuta, tsatsi ishike mani puta. E ga-umatsityaimishi hawe tyeeuku, naisheetsi tyiwittaana tania: Yuku piawa, she hamashu shikuwa-kaatyikuiya. Etyu tyaipeyuta tyayitsakuiya: Tsi tsa Israel ga-kanieru tsaitrawani niya tsatsi shityaakuiyanatya. Shrue emi kui-tsheshi hawe tsutyu, hau chaashitotru si tyanatasu: Huchani, kumatsani.
- 26 Shrue tyipeyuta e chatsa: Iatra ga-semitashi utawi e diya hau utyityi tsatsi shrami tsanu. Etyu tyipeyuta, Kaimatsi, Huchani. She etyu diya kupbeokuiya shikutruna tsidyashi ga-mesa dyika yuku nu pekanishi.
- 28 Shrue Jesus tyipeyuta taatsakuiya: A, Ku, kutrauhimaty mame tsishatsi; emi kutru-tsiputyishi e-putrutra ni. Shrue ga-maku ai ura si yuku sai si tyiutsaipu.

- 29 She Jesus ai yuku si tsutyu, e Galilee kutaashi butru haweku hau taatsi, e kotyu ye dyu tsutyu e ai si chukuiya. E mame tsi hanowishi hawe shichaku, e hawe tyayitrutseyana tsa itye tsekkuiyanishi, tsa tsayakashityisishi, tsa katsiatyishi, kowakusutsitanishi, e naoya mika, e Jesus gaapishra ai si nu tyiatana, she si tyuwatsaipunaii. Emi heya tsi hanowishi imi ma tayatra, kuwakachanatyi tsa katsiatyishi si katsiatyi, e kowakusutsitanishi si tawa tsayatrani, e tsa itye tsekkuiyanishi si tsekkuiyani, e tsa tsayakashityishi si tsayakashityitratyia, shrue Israel ga-Iusi tyiuamashityia.
- 32 She Jesus ga-umatsityaimishi hau si tyiwapeotsa, tyanata: Towa tsi hanowishi amo-siwatyuityikuiya, she shru chami sai saiwatyise e tsatsi tsi kaupbewishitya, e kuwashruikanishi tsatsi tuwe yuku si nieitrawashikunu, tsi shru tsi hiyani dyika ye kowayushityemiwanu. Shrue ga-umatsityaimishi tania: Hatyi semita tui tu tshetra nuwayatyeyawa-sutrusa towa tsi hanowishi washu neyetyishana-sutrusatyi? She Jesus e-tyayitsakuiya: Hatsu semita kutraishi? Shrue tyana; Maityana, e hatsue drugasha shikaashi. Shrue tsi hanowishi ai nu tsaatyi si nu ukuyani tyayayanikuiya, shrue we maityana semita e shikaashi chuiyatyeya, shrue tyuinamatawani, e chaotsayutsa, e ga-umatsityaimishi tyaiwayatyi, shrue ga-umatsityaimishi tsi hanowishi dyika ye. E shrue sai haupa tyaapbe e chatrukaii. Shrue kaatumishi si dyu chuwatana, maityana kanashitu gutana chaatyu. She tyaapbetyishi tyana miri hatrutsai, e hau yuwi kuiyawitra e iatra. E shrue tsi hanowishi ai si yuku tyaitrawa, kanue si dyu tyiupu, shrue Magadara hatsi kupichanishra hau taatsi.
- 16 She Parasai hano e Sadakai hano hawe tyeeuku, e tyiutanikuiyana tyuwittaana tsi haityi Kaunamatsi si utyiemitrani tyiemi gayiwaatrani. She etyu tyaipeyuta tyayitsakuiya: Shapuka ni kaetrani kutrana, Anye nyieshityitruku, she tsamuka ni howaka kukani. E tsika gayu tse, Tsatsi tawa nieshikakunu, she howaka

kukani e nuka tsitotya. Gowa howaka tsityemitrani shruwittawanisha, eku etyu chitye e kaetranishi
 4 utyiemi-trani tsatsi itye shruwittawanishatya. Sutsi me e tuwe gayauiaityia kaatonimishi utyiemitrani tsiyaipatyikuiyana, etyu tsatsi tsi ishika utyiemitrani nyeyaapikunu, tu heme Jonah ga-utyemitrani. Shruue tu tayatra e yuku si tsutyu.
 5 She ga-umatsityaimishi wewisa hawe tyeeuku, e
 6 tyiwatyumitruwi semita unatsiyi. E Jesus e-tyayitsakuiya: Chuwatsityishityia e bashru-trusa Parasai hano e Sadakai hano kashratyi gaashetyishi. She ga-umatsityaimishi chayania: She tsatsi semita shiku-uanatsitya. She towa Jesus kuwittawani e-tyayitsakuiya: Mame tu etse koimi kutruwahimatyishi! Tsekoma shruwatsityishityia, tsatsi semita kutraishi niya ka? Tsatsi na truwittawanisha ku tsatsi trutyumisha taama semita e taama miri, e hatsu kanashitu dyu shruwatanatyishi? Ku maityana semita e tyana miri,
 11 e hatsu kanashitu dyu shruwatanatyishi? Tsi gowa tsatsi shruwittawanishatya tsa semita niya shrayimnatya, etyu bashru-trusa Parasai e Sadakai hano
 12 gaa-kashratyi. Shruue tyuwittawana Jesus tsatsi tyanata bashru-trusa semita kashratyi, etyu emi Parasai e Sadakai hano gaa-aisomeshitani.
 13 Shruue Jesus Caesarea Philippi tsaashityitra ai shriena hau tsaatsi ni, ga-umatsityaimishi tyiwapeta e-chatsa: Hau hano ga-mutyi sutyeshi suta hano gana?
 14 Shruue tyanata: Mika gana Baptisma John tyuta, mika Elijah, e mika Jeremiah ku hau ye emi prophet tseshi. Shruue tyayitsakuiya: Etyu hau hinome sutyeshi
 15 kutrana? She Simon Peter tyipeyuta tyanata: Christo, tsiitanishi Iusi ga-mutyi kuta. She Jesus tyipeyuta e taatsakuiya: Kutraueetyi Simon Jonah ga-mutyi; she sinani e matsi tsatsi towa tyiemi kutyitranu, etyu
 18 Kaunamatsi gaapishi sa-naishityia. Shruue tsika hinome shraatsakuiya, Yaoni-siwa kuta, etyu towa yaoni-tsa si dyu sa-aiwatyami naatra-si, e ushityi tsiana tsatsi
 19 niushia-tsiumanu. Kaunamatsi itye-tseshra aatawi

niukuii-shroma, she hautsi tui gaishibishra dyu shipashityanu, emi ai Kaunamatsi dyika tsiupashityanishi n'taku, e hautsi tui gaishibishra dyu shatoinaimanu, emi ai Kaunamatsi dyika tsatoinaimanishi n'taku.
 20 Shruue ga-umatsityaimishi tyayatinaika heya tsatsi hau uppeni wa Christo tseshi.
 21 Shruue ai si yuku, Jesus ga-umatsityaimishi dyika tyiemi tyayiwatytani tsi gowa Jerusalem ye tsunyetyunishi e tsaya tsaaputyishi e chayani-tyitra e tsidyatranikusana niya mame tsi naoya nunatyumetyu, e shruue nyeottawatyu, e shruue chami sai tsashityi dyu nyeepatyumetyu. E Peter tyitya, e shruue ai si yuku tyiishikuiya tyanatasu: Huchani, towa hishrome dyika si tiye e-pee; tsatsi mame towa e-naitra-shrunu. Etyu chaishigutra Peter taatsakuiya: Satan, hinome ai kaatya ye ima. Hinome dyika tsayawikawatsita kuta; Iusi tsi niya tsatsi shrutsityishitanu etyu hano tsi niya.
 24 Shruue Jesus ga-umatsityaimishi tyayitsakuiya: Hau tsi e-kunu hinome dyika hamashu utsutsi, noyu tsi pautowi e ga-shukuchatsi dyu payaou, e hinome dyika ye hamashu pikashu. She hautsi e-kunu ga-iani utragumi, tu niutratsiuma; e hautsi su-tsi niya ga-iani tu nitrakunu, emi niyainakuni. She haityi tsi niya hano yuku naukumiku, tsi sai gaishibishra tsishia, e shruue noyu ga-iani tu tsiutranu? Ku haityi tsi niya ga-iani neyayakuku? She sekka hano ga-mutyi hawe tsunyeku, ga-naishityia ga-uamashitanishi niya, e Iusi ga-upeseyityaimishi niya, e shruue haupa nowaina, hatsu-maku ga-tanishi, si nyiwiyaaniku. Kaimatsi shrayitsakuiya, tui tseechanishi gayaa, tsatsi ushitoni nutruwatsitawa-kusatya, menashru kuukachanaty hano ga-mutyi hawe tsunyekunishi, ga-itye-tseshra niya.
 17 E ai si yuku shichisu sai kaetranu, Jesus gayatawi Peter, James e ga-tyumu John, tiye dyu kotyu ye tyayitrutse. E ai yani tseema maiani ma tse nanami tyitra, e oshratra me kuwawi tyiushityemitsita e ga-wakuni shamutsi chaetra, gaishibishi ma tse. E mu,

- 4 Moses e Elijah chutyemitrano e tyiminatyikuiyana-tyutsi tyuwakachana. E Peter tyipeyuta e Jesus dyika taatsakuiya: Huchani, Tui sutyemishi tawa tsa. Tsi e-shrunu, tui chamie uameshityi nuwitra-si, ishike shrutsi niya, e ishike Moses kutsi niya, e ishike Elijah kutsi niya. Tu na katsa ni, mu, kushityemitsitanishi henatyi kunashipatyi tayiwatrani; e mu, henatyi dyika si nu katanishi tyanata: Towa sa-mutyi tsa, tsiutsimunishi, emi niya shikunama; puikanatyi. E ga-umatsityaimishi kakanatyi kowawawi niya nuka chuwachana, e mame chaaputsa. Shrue Jesus tsutyu tyiwapakatsa, tyanata: Si dyu tyeeptyuni, e bami chaaputsa. Shrue si dyu kowakametya tsatsi hau tyiukachana, tu heme nowe Jesus.
- 9 Shrue kotyu hawe si nu tsekkuiya ni, Jesus tayayanikuiya tyanata: Bami towa tsiukachanishi hau pupena, menashru hano ga-mutyi ushitoni si dyu tsiipatyu ni. E ga-umatsityaimishi tyiupetawa, tyana: Tsekoma tsidyatranikusana kana, Elijah sekka tsaya n'yetsiku? E Jesus tyayipeyuta tyanata: Kaimatsi Elijah hawe tsuku, e sai tsi shrami haku si nitraku; etyu shrayitsakuiya, Elijah mishru hawe tsuku, e tsatsi tyinimasatyanu, she etyu tsi gowa tsiwatsiputyishi e-tyityityia. Emi taa etyumu hano ga-mutyi niunatyumena-kusa.
- 13 Shrue ga-umatsityaimishi tyuwittawana tsaiminatyishi Baptisma John niya tseshi.
- 14 Shrue tsi hanowishi hau tseetyupi, hatrutsai hawe tsuku kaashitotrumi tsaatsakuiya: Huchani, sa-mutyi putyuityikuiya, she gowa ma tsityita e mame kunatyumesu, e haikami na tsipashi dyika nu kaotyaisita, e haikami na tsitsi dyika nu kushikumeta. Shrue kutra-umatsityaimishi dyika hau sewayutsemi, etyu tsatsi itye tsiutsaipunaisetya. E Jesus tyipeyuta e-chatsa: A, Tsatsi uhimaty e yukuma e-tsekkuiyanishi kaatoni! Hatsumashu tuwe na naiwatyisu-sutrusa? Hatsumashu nunatyumi-si? Tuwe kuyutsemi. E Jesus taatyinaika, shrue ganatyaya si tyiuyumu; she mutye tseshi ai si yuku tyiutsaipu.

- 19 Shrue ga-umatsityaimishi Jesus dyika hau tyeeku, e maku me tania: Tsekoma tsa itye siutyikumi?
- 20 E tyayitsakuiya: She koimiku kutra-uhimatyishi niya ka. She kaimatsi shrayitsakuiya, Tsi ishike waku kawitsi me kutra-uhimaty tnanu, itye towa kotyu nyenia-kutrusa, Tui yuku yuke tsuani, shrue tsunyeku; e tsatsi tsi haityi e itye e-nitrana-kutrusatya. She etyu towa taa tseshi tsatsi tuwe yuku si kumusunu, heme menashru amoma niya e ushrukamishi niya.
- 22 E Galilee ai dyu e-tsekkuiya ni, Jesus e-tyayitsakuiya: Hano ga-mutyi hano kamashityi dyika ye niyekuyana-tsaomasa; e shrue niyumutyitsana-tsiumasa, e shrue chami tsaashityi si dyu nyeeptyuni-tsaomasa. She mame ayama-tyusa.
- 24 Shrue Capernaum ai hau tseetyupi, aitsuwani sawaka kaukuiyaukuiyana Peter dyika hau tyeeku, tyana: Gao tsatsi kutrayi-someshita aitsuwani sawaka chaitsuwita? E chatsa: Ha. Shrue hawe katrutya ye si kupuni, Jesus tsaya tyimina, tyanata: Simon, Gowa shru-tsityishita? Gaishibishra dyika dyu rai tsaaputyishi hautsi dyika si aitsuwani e ayaapi kaya-ukuiyana? Ga-mutyityaimishi dyika si, kume mika hano dyika si?
- 26 Shrue e-tsipeyuta ni, Mika hano dyika si. E Jesus e-taatsakuiya: Emi heya iatratyaimishi itye yuku tsee.
- 27 She etyu, tsa nyeyanachupatsa-shrusatyani, kutaa ye ima, shrue aityatyi hau ninawi-shru, shrue haikamiku hawe dyu kumunishi shikaashi dyu nayao-shru, shrue tsiika shra-shaatawitya niyaina-shru ishike sawaka. Tuwa shrayaanu e nyeyaawi-shru, shrutsi niya e sa-utsi niya.
- 18 Emi eyu we ura ga-umatsityaimishi Jesus dyika hau tyeeku tania: Kaunamatsi dyika hawi mame tsichunishi tsa? Shrue iatra hawe tyiuepotsa, e ai suna si nu tyikuiya, e e-chatsa: Kaimatsi shrayitsakuiya, tsi tsa shrayaishigutraenu e towa iatra me e-kutrayatranu, Kaunamatsi itye-tseshra mame tsatsi itye n'yeepu-kutrusatya. Emi heya hautsi towa iatra me amoma-

- kaumanu, emi wa Kaunamatsi itye-tshetra dyika mame
 5 tsichunishi tsa. She hautsi ishike taa tse iatra kushu-
 6 tsa, tsika emi hinome shikushutsa. Etyu hautsi, tsi
 ishike towa iatra, hinome tsiuhimatyishi, kuupakasha-
 nu, mina tawa naetraniku tsi tsichu yaoni ga-witra ye si
 tsaototyanyitya, e kutaa tiye nu tshetra dyika nu
 tsaashikumenatya.
- 7 Eiya, gaishibishra, upakashani niya! She gaishe
 hawe upakashani n'taku, etyu Eiya hano naetraku
 8 hautsi upakashani tsityitanu. She tsi shramashityi ku
 shrashityi kutrupakashanu, chuutsutrutsa e traawi;
 mina tawa naetranishru, bato tu me trukusutsitani e
 tsa itye-truni iani hau shrupunu, e tsatsi dyue shra-
 mashityityishi e dyue shrashityityishi tsiyakamitse
 9 tsipashi ye nu shaawitya. E tsi kutraana kutrupakasha-
 nu, dyu puku e tratyitru; mina tawa naetranishru, bato
 tu ishike kutraanatyi, iani hau shrupunu, e tsatsi dyue
 kutraanatyi shruwatyamutse tsipashi ye nu shaawitya.
 10 Bashru-trusa tsa haityi towa iatratyaimishi niwaiyana-
 kutrusatya. She shrayitsakuiya, ai Kaunamatsi dyika
 upeseyi-gaishimityishi dyutseshru Kaunamatsi gaa-
 11 pishi sa-naishityia kowawi kuukachanikuiyana. She
 hano ga-mutyi hawe tsuku, kaitrawanishi ayatragumi
 12 niya. Gowa shru-tsityishita? Tsi hau hano katsi-wa-
 katsi kanieru gatyashra, e ishike ai si yukuma tsukunu,
 gao tsa mayuka-wa-katsi mayuka tsitra ai tu gayatranu,
 e kotyu ye dyu yuku tsutsishi, yukuma tsu-tsheshi
 13 tyiypatyikuiyanu? E tsi emi tsiyainakunu, kaimatsi
 shrayitsakuiya, mame mina yuku towa niya tsiuishityia-
 ni, tsatsi hemaku mayuka-wa-katsi mayuka tsitra tsa
 14 yukuma tsekkuishi kuwatsi niya. Emi taa tsatsi
 Kaunamatsi gaapishi kutra-naishityiashi ga-uwayani-
 shra towa iatratyaimishi ishike puta nayawaku ni.
- 15 She tsi kutra-tyumu hishrome dyika kokitsanu,
 hake ima, ga-ukitsishi tyiemi piutrani, nowe ai ku-
 traapi. Tsi kutru-kanu kutra-tyumu shiumatsani
 16 ushiawi. Etyu tsi tsa niukaka-kutrumanu, ishikashu
 ku dyuishu nyeeyutse-shru, emi heya dyue ku chamie

- shityishityiku niya sai tsi tzeni kaimatsi naetraniku.
 17 She etyu tsi tsa tuwa niwakaka-kunu, aiwatyami-gaya
 dyika nippe-shru; she etyu aiwatyami-gaya dyika tsi
 tsa niwakaka-kunu, nanami hano me e kaukitaukuiya
 18 me piukai. Kaimatsi shrayitsakuiya, haityitsi nipashi-
 tyana-kutrusatya, tui gaishibishra dyu, emi ai Kauna-
 matsi tsiupashityanishi n'taku; e haityitsi nyetoinaime-
 kutrusatya, tui gaishibishra dyu, emi ai Kaunamatsi
 19 tsatoinaimanishi n'taku. Tsika na shrayitsakuiya,
 hautsi dyue kutanu haityitsi niya kutruushranu, tui
 gaishibishra dyu, tsi kuwittaanutyu ka, emi Kaunamatsi
 20 gaapishi sa-naishityia dyika e-nieutrani-tsiuma. She
 hatyi dyue ku chamie, E-seshi niya, kaiwatyamishatya-
 nu, tsika ai niutaa-si.
- 21 Shru Peter hawe tsutyu e tyanata: Huchani, hatsu-
 wa ka na sa-tyumu hinome dyika niukitsitaku ni, e
 22 niutaipunai-si? Kume menashru maityana-wa? Jesus
 taatsakuiya: Tsatsi shratsakuiya menashru maityana-
 wa, etyu menashru maityana-wa-katsi, maityana-wa.
 23 Emi taa, Kaunamatsi itye-tshetra haityi rai kushigayu.
 Towa rai tsitanitranityishi tsitrugayamitsishi sashi-
 24 tyina nitraku. Shru shru kuwittawani, ishike hawe
 25 taytsemitta katsi miri sawaka tyitrugayamishi. She
 etyu, tsa itye aitsuwanishi gashi niya, ga-huchani
 tyiyanikuiya towa tsitanitrani e ga-okui e ga-iatratyai-
 mishi e sai tsi gashi uishani, e shru heya nitsuwaniku.
 26 Emi heya tsitanitrani nuka chucha kaashitotrumi,
 tyanatasu: Huchani, kuyukamini, shru sai tsi niatsu-
 27 wani-si. Shru towa kutanitra ga-huchani tyutyuityi-
 kuiyani, si tyikuya e tsitrugayamishi tyiwataipunaii.
 28 She etyu, tuwa kutanitra hake si tyumu, shru ishika
 kutanitra, katsi maityana tsitra sawaka tyitrugayamishi
 tyiyaina, she tyitya, ga-witra shru ni, e taatsakuiya:
 29 Kutratrugayamishi chaitsuwa. Etyu yu towa kutanitra
 nuka chucha tyiwittanikuiya tyanatasu: Kuyukamini,
 30 shru niatsuwanis-si. Etyu tsatsi e-tyu, etyu tyiyutse
 ayatsitani dyika tyipunaii, menashru tsitrugayamishi
 31 nitsuwa-tsiumanu. Shru mika kowatanitra tsi e-

kaetranishi kuukachanaty, mame ayamatyusa, she ga-huchanishi dyika hau tyeeeku tyiupena sai tsi kui kaetranishi. Shrue ga-huchani hawe tyiupetsa, e 32 tyanata: Sutsi-me kutanitra kuta! Tyuwittanikuiyani-shi niya, sai tsi we tyutrugayamishi shrawataipunaii; 33 emi e shrautyuityikuiya ni, trutyumu tsatsi tsika emi taa 34 shrutanitanutyu niutyuityikuiyatra? She ga-huchani chutsayawa, e gayatsitanikuiyana dyika hau tyikuya, 35 menashru sai tsi tsitrugayamishi naituwakunu, Emi taa Kaunamatsi gaapishi sa-naishityia hishrome dyika e-niyatra-kutruwatruma, tsi tsa kutraya-winoshika dyika si dyu haupa nuwaina kutra-tyumu shruwataipunaima.

19 She e-chaetra, Jesus towa mani gaunaottani, Galilee si yuku tsutyu, Judea hatsi kupichanishra, 2 Jordan chuna wewisa dyika ye tsutyu; e mame tsi hanowishi hamashu shichaaku; e ai tyiwatsaipunaima. 3 Shrue Parasai hano hawe tyeeeku tyiutonikuiyana, tania: Ite e-ta, hatrutsai ga-okui tuwe haityi puta 4 shiya yuku ukuyani. E tyayipeyuta e tyayitsakuiya: Tsatsi na trukachana towa tsidyatrani, Tsaya tsaauitra- 5 niashi hatrutse e kuitsa taauitra, e shrue e-chatsa, towaya si dyia hatrutsai ga-naishityia e ga-naia tu 6 nieitraku, shrue ga-okui dyika nityishityui-ku, she towa dyue ishike sinani n'taakuu? Emi heya tsatsi na dyue 7 tsaanu, etyu emi ishike sinani tsa. Emi heya tsi haityi Iusi hau kuchukunu, bami hau hano piuchukuto- 8 wa. She e-tania: E tsee, tsekoma Moses kuwaya yuku ayakuyani-tsidyatrani ayaapi e shrue yuku ukuyani? 9 E tayitsakuiya: Kutraya-winoshika gayayumishi niya, kutra-okuiishi yuku ukuyani Moses tutraiwaheetsani, 10 she etyu tsaya si yuku emi tsatsi taa tsanu. She e shrayitsakuiya, Tsi tsa tuwe uiani niya ka, hau tsi ga-okui yuku tsikuyanu, e shrue ishika tsiwakuitranu, tuwe uiani kokitsa; e tsika hau tsi yuku tsiukuyanishi tsiwakuitranu, tuwe uiani kokitsa. Ga-umatsityaimishi e tania: Tsi towa taa tsanu, hatrutsai ga-okui dyika

11 uakuitranu tsatsi tawa tsa. She e-tyayitsakuiya: Tsatsi sai hano itye towa mani nayawakusatyanu, she 12 etyu nowe tsayaapishi. She mika tsa itye noiasetyikunishi noyu emi e ga-naia ga-washrani si tseemuni; e mika tsa itye noiasetyikunishi, hano niya tsaya- 13 uitranaty; e mika tsa itye noiasetyikunishi, noyu emi e ka-uitrana, Kaunamatsi itye-tshesha kutsi niya. Hautsi 14 itye towa mani niyashityuwanikunu, peeyashityuwani. Shrue iatra hawe traawatrutsemitta, kamashityi 15 niya niwapakatsaku ni, e amoma nitraku ni. She ga-umatsityaimishi tyiushikuiyana. Etyu Jesus e- 16 chatsa: Payawaheetsanitta iatra hinome dyika hau utsutsi, e bashrumi tsa paiwayanitta; she towa taa tse 17 niya Kaunamatsi itye tshesha tsa. She kamashityi niya kuwapakatsa ni, ai si yuku tsutyu. Shrue mu, ishike 18 hawe tsutyu taatsakuiya: Tsayasomeeshita, Tsi haityi tawa tsheshi e nitra-si, emi heya tsiyakamitse iani 19 nasinishi? E taatsakuiya: Tsekoma tawa tsheshi niya tyiupeta? Tawa tsheshi ishike e-tsa; etyu tsi iani dyika uyupuni kutru-tsiputyanu, tsiuwayanishi niwatsitokai- 20 shru. Shrue e-taatsakuiya: Haityi? She Jesus tyanata: Bami peiawa. Bami tuwe peiaua, Bami chucha- 21 wa. Bami tsa kaimatsishi shityishityiku chuwitra. Tsityumi paaitrani kutra-naishityia e kutra-naia. 22 E gowa noyu shruitsimuni, emi e mika putsimu. Shrue mutye tsa taatsakuiya: Sai tsi towa sa-utsitokai, 23 Haityitsi tsa sa-washu-trani. Jesus e-taatsakuiya: Tsi washu e-n'ta-shrunu, ima, tsi kutrashi nisha-shru, e shrue amome tsaaputyishi nyeiwakui-shru, e shrue 24 Kaunamatsi dyika tsityumishi naa-shru. E hawe, hinome dyika ye hamashu chikashu. E shrue mutyetsa towa kaka ni, ayamaku ni yuku si tsutyu, she mame tsi chaishi. She Jesus ga-umatsityaimishi tyayitsakuiya: Kaimatsi shrayitsakuiya, nukaosaku riku tsheshi Kaunamatsi itye-tshesha dyika ye niupuku ni. E tsika na shrayitsakuiya, mina tsatsi kaosayu gameyu upunatsi ga-ana dyika ye niukumunishi, etyu riku tsheshi Iusi ga-

25 itye tshesha dyika ye uyupuni mame ga-ukaosa. She
 ka-umatsiyaimishi kakanaty, mame imi ma tayatra,
 26 shrue tyana: She emi hawi itye nitraguku? She Jesus
 tsiwamekumeni, tyayitsakuiya: Hano niya towa tsatsi
 27 itye tsa, she etyu lusi niya sai tsi itye tsa. Shrue Peter
 tyipeyuta, e taatsakuiya; Mu, Sai tsi tu sitrana, shrue
 hishrome ye hamashu saakashumi. Shrue tsi n'trashi-
 28 sutrusa? E Jesus e-tyayitsakuiya: Kaimatsi shrayitsa-
 kuiya, hinome ye hamashu shraakashumishi tsika na
 iani tsaashityi, hano ga-mutyi ga-uamashitanishi dinya
 tshesha ga-anamatyi ai si dyu kukuiya ni, trutyumu
 katsi dyue tsitra dinya tshesha anamatyi ai si dyu
 naata-kutrusa, e katsi dyue tsitraya Israel ga-hano-
 29 tyaimishi niwatana-kutrusa. She sai heme katrutya,
 ku ga-tyumutyaimishi e ga-watratyaimishi, ku ga-
 kuitratyaimishi e ga-aotyaimishi, ku ga-naishityia, ku
 ga-naia, ku ga-iatratyaimishi, E-seshi niya tu kayatra,
 katsi-wa-katsi yuku nyeepeku, shrue tsiyakamitse iani
 30 naku. She etyu naoya tsaya tsaaputyishi chai nataapu-
 kusa, e chai tsaaputyishi tsaya nataapu-kusa.
 20 She Kaunamatsi itye-tshesha, wa gayu chama
 hake tsutyu, kowatanitra ga-mataiku tsaisira ye
 nowatanitra-kusatyiishi tyayayanikuiyanishi katrutya
 2 yani tsheshi kushigayu. She katsi maityana tsitra sentawa
 ishike sai kowatanitra tsiwashrani, ga-mataiku tsaisira
 3 ye tyiyata. E haityitsi chami ura kaetra ni, hake tyumu,
 tsishityia tshesha dyika tu ma we tseemishi hawe
 4 tyeechanishi tyiwakacha; shrue tyayitsakuiya, Trutyu-
 mu mataiku tsaisira ye tyeeekuma, she shrami me
 5 niwachani-shrawatruma. Shrue hake tyeeeku. Tsika
 na, haityitsi shichisu ura, e shrue mayuka ura kaetra ni,
 6 taa e-tyitra. Shrue haityitsi katsi ishike tsitra ura
 kaetra ni, hake si tyumu e mika tu ma we tseechanishi
 tyiwayaina, e shrue tyayitsakuiya: Tsekoma tu ma
 7 tuwe settyutse kutyeechanishi? Tania: She tsatsi hau
 utrani shityayayanikuiya. She e tyayitsakuiya: Trutyu-
 8 mu mataiku tsaisira ye tyeeekuma. Shru, shapuka ni,
 mataiku tsaisira yani tsheshi ga-umatsi tatsakuiya,

Kowatanitra puwapeotsa, shrue gowa gayatyumishi
 payatsuwa, chai dyika si shrototsani, tsaya dyika hema.
 [9 She katsi ishike tsitra dyika ura tsayayanikuiyanatyishi
 hawe tsekkuii, haupa sai heme katsi maityana tsitra
 10 sentawa tyayatsuwa. She tsaya tsheshi hawe tsekkuii,
 tyinaetrani mina yuku nutrayaitsuwani-kusanu, etyu
 etyumu tsika hemaku tyayatsuwa, katsi maityana
 11 tsitra sentawa. Shrue kaukuiwatyi, yani tsheshi dyika
 12 tsi tania, tyana, Towa chai tsaaputyishi tu ishike ura
 kuwatanitra, she etyu hinome sutaaputyishi sai settyu-
 tse kaosame tsheshi e ganani suwanatyumenatyishi
 13 sashityina shrayatra. Etyu tyayipeyuta haityi e taatsa-
 kuiya, Sa-ukini, tsatsi tsi sutsi me e-shraitra. Gao
 tsanu katsi maityana tsitra sentawa niya tutruushra?
 14 Dyu chayaou kutrashi, e yuku ima; she e-si towa chai
 15 tsaaputyishi e hishrome sashityina ayaapi. Tsatsi itye
 tuta, tsi sashi noyu gowa e-nitrasinishi? ku emi hinome
 16 tawa sutanishi niya, sutsishu tutraanaty? Emi taa chai
 tsheshi tsaya n'taku, e tsaya tsheshi chai n'taku. She
 naoya tsa tsiwapeotsi, etyu hatsue tsayaatawi.
 17 Shrue Jesus Jerusalem ye dyu ga-ani, ga-umatsi-
 tyaimishi yuku tyayitrutse, e hake tsekkuiya ni tyayi-
 18 tsakuiya: Mu, Jerusalem dyika ye dyu sutyeeeku, shrue
 hano ga-mutyi yani tsheshi chayani e tsidyatranikusana
 dyika hau n'yekuyana-tsaomasa, shrue ushitoni nyeou-
 19 masaku, e nanami hano dyika hau n'yekuyana-
 tsaomasa, nyiemayani-tsiumasatyishi niya ka, e
 nishayana-tsiumasatyishi niya ka, e shukuchatsi dyika
 si nu niyetotyana-tsiumasatyishi niya ka; shrue ai si
 chami tsaashityi dyika, si dyu nyeeipatyumeku.
 20 Shrue Zebedee ga-mutyiyaimishi gaa-naia hawe
 tsutyu ni chaashitotru, e tsi haityi tyuwittaa. She Jesus
 21 tyanata: Tsi kutrutsipu? Shrue tyanata: Chuwaya towa
 dyue sa-mutyiyaimishi kutra itye-tshesha dyika
 nukuiyanukuu, hishrome shruiyanu, ishike shrumika-
 22 waya si nu ye, e ishika ishuya si nu ye. Etyu Jesus
 tyipeyuta, tyanata: Tsatsi shrutonime tsi tyuwittanishi.

- 23 Itye niishikatronu-shru niishikasinishi ushikaty? E tania: Itye sutaa. Shrue tyayitsakuiya: Kaimatsi sa-ushikaty dyika si nitraashikata-kutrusa, etyu sa-shrumikawaya e sa-ishuya ukuiyani tsatsi ayaapi itye shityanu, etyu
- 24 sa-naishityia haku gaiwatronityishi. Shrue katsi gamatsityaimishi towa kakani, dyue kayatyumushi dyika tsatsi anye-tyiwautra. She Jesus hawe tyipeotsa
- 25 tyayitsakuiya: Shrutonimasa, nanami hano dyika gahuchani tseshi mame gowacha e ga-dinya tseshi itye tsiwautyita. Hishrome kutyeeema tsatsi emi taa n'takunu. She etyu hishrome kutyeeema hautsi dinya nitra-
- 26 tsiumanishi tsiutsiputya ayaukashani kutrashi n'taku. E hautsi kutyeeema dyika tsaya n'takunishi tsiutsiputya, utanitrani kutrashi n'taku. Emi taa hano ga-mutyi hawe
- 28 tsutyu, tsatsi nyeeokashaku ni, etyu no nyeyaokashaku ni; e ga-iani hawe nitraku ni, naoya tsa hano kuwatsi niya aitsuwani n'takunishi niya ka.
- 29 Shrue Jericho tsaashityitra si yuku tsekkuiya ni, tsi hanowishi Jesus dyika hamashu shichaaku. E Mu, dyue hatrutsai tsa-tsaakashityishi hiyani ishikayashu
- 30 si tyaa, e Jesus tsiyatyutsatani kaakani tyaatyikoesu tyaanikuiya: Huchani, kuutyuityikuiya! David gamutyi kutyeshi! She tsi hanowishi tsiwishikuiyana,
- 31 maku nutruunkunutyityishi niya ka. She etyu mina hemashu tyaatyikoesu, tyaanikuiya: Huchani, Kuutyuityikuiya! David gamutyi kutyeshi! She Jesus
- 32 chutyutsi tyuupeotsa tyaatsakuiya: Tsi kui kutruutsipu niyeeitra-shraomanishi? Taniaputyu; Huchani, sutraa-
- 33 ana si nyeeta-shikuumanishi. She Jesus tsiutyuityikuiyani gaa-ana tyuupakatsa, shrue tu haikamiku si
- 34 taaikashityitratya shrue hamashu tyeeyu.

- 21 Shrue Jerusalem hawe ena tsekkuiyi, Olive kotyu hawe e Bethphage tsaashityitra hau tyeetyupi, Jesus
- 2 dyue ga-umatsityaimishi hake tyaakuiya, tyaatsakuiya: Wa ai tsaashityitra hake tyeema, shrue tu haikamiku huru kaatyumishi niyainaputyi-kutruu, e washityi tsa ai n'traakuu, niukatyumitowanu-kutruu, shrue tuwe

- 3 niyeyutsetyu-kutruu. E hautsi haityi tsi kui kutraatsakuiya nitraanikui-kutruu, Huchani niutyawa-tsiuma,
- 4 shrue haikamiku nyeeekuiyaku. She towa e kaetra emi heya prophet niya e-katsanishi e-naitrakunishi niya ka; e-chatsa:
- 5 Zion ga-maku niuppena-kutrusa, Mu, Kutra-Rai tuwe niutsuku-kutruma, shrana tse ni, e huru niya dyu gaapi, e uputyinami huru hatrutsa washityi niya dyu gaapi.
- 6 She ga-umatsityaimishi hake tyeeyu, Jesus tsaayani-
- 7 kuiyanishi e-tyitranu. Shrue huru e washityi hawe si tyaayutsetyu, shrue ga-wakuni ai dyu tyishanaty,
- 8 shrue ai si dyu chukuiya. E naoya tse tsi hanowishi gaawakunutyaimishi hiyani dyika ye nu tyishana, etyu mika kiwa tseshi tsaashityumishi chaotsutrutsana,
- 9 shrue hiyani dyika ye nu tyishana. She ai yani tsekkuiyanishi tsi hanowishi e hamashu tsekkuiyanishi tyuwashigaitsita, tyana: Hosana, David gamutyi! Uamashitani tsa, Huchani E-gashi niya hawe tsutseshi!
- 10 Hosana dinya tseshi! Shrue Jerusalem hau tsaatsi ni, sai tsaashityitra ganashiyani tayatra, e tyatsia: Hautsi towa? She tsi hanowishi tyana: Towa prophet tseshi
- 11 Jesus, Galilee hatsi, Nazareth tsaashityitra si.
- 12 Shrue Jesus tsityumi-katrutya hake tyiupu, e sawaka gayayakuse gaa-mesa tyayatsitamatsa e tsika huuka tsiyatyityia ga-anamatyishi; she tyayitsakuiya: Emi e tsidyatrani, Sa-ama ai amoma utrani katrutya nieinimasaku, etyu kuwachawaityia katrutya shruwa-
- 14 uitrana. She tsa-tsayakashityishi e gowakusutsitanishi ai tsityumi-katrutya gaapishra hau tyiwatsekku, shrue tyiwatsaipunaii. She etyu yani tseshi chayanityitra e tsidyatranikusana tsi kui imi me e-tsitranshi e ai tsityumi-katrutya dyika, Hosana, David gamutyi katyinyikanyityishi iatra kowakanaty, chaatsayawana.
- 16 Shrue e-tania: Traka tsi gowa kanatyishi? E Jesus e-tayitsakuiya: Ha, Tsatsi na tsidyatrani trukachana, gowa owaka e tseeshityekuiyanatyishi tsaya-ka si dyu kukimunishi uamashitani kutra? She tu tyayatra, e
- 17

tsaashityitra si yuku tsutyu, e Bethany hau taatsi e ai chukuiya.

- 18 Shrue na nu gayutse, tsaashityitra hake si tsutsi,
19 tiyamashito. She fig-hitrae hiyani ishikayashu kuukachani, hau taatsi e tsatsi tsi ai dyu tyukacha, tu heme masani; she taatsakuiya: Wai si yuku tsiyakamitse hema tsatsi na hitrani e-niutyita-kutrumanu. She
20 tu haikamiku hitrae tyipanito. She ga-umatsityaimishi kuukachanatyti chaaputsa, e tyatsia: Gowa fig-hitrae haikamiku tsipanito? She Jesus tayipeyuta tyanata:
21 Kaimatsi shrayitsakuiya, tsi uhimatyti kutraashityanu, e tsi tsa tu ushinaetranishatyanu, tsatsi tu heme fig-hitrae tsaetranatyishi e-nitrana-kutrusatyanu puta, she etyu tsi towa kotyu shaniatyanu: Dyu putraatawa, shrue
22 kutaa ye nu putraatyitruui, emi e naitraku. E tsika sai haityitsi amoma-utrani niya shruwauttaanatyanu, kutruwahimatyti, nayaawa-kutrusa.
23 Shrue tsityumi katrutya hake kupuni, tsayasomeshitani, yani tseshi chayani tsaaputyishi, e hano tsaya tsaaputyishi hawe tyiwatsekku, shrue tania: Haiyti tsi itye niya towa e-kutyekkuiya? E hau towa itye kutyitruani? E Jesus tyayipeyuta tyayitsakuiya; Nutyumu ishike mani niwapeta-shrawatruma, shrue towa tyupenatyanu tsika hinome niwape-shrawatruma haiyti tsi
24 itye niya towa e-sutyekkuiyanishi. John ga-baptisma, hatyi si tsa? Kaunamatsi dyika si, kume hano dyika si? She chuwatsityishita, tsi natrana-sutrusatyanu: Kaunamatsi dyika si tsa; e-nyetsakuiya-shikuwatrumanu, She
25 e tsekoma tsa shruhimatawana. Etyu tsi natrana-sutrusatyanu, Hano dyika si tsa; tsi hanowishi shikai-putsani, she sayu tse John prophet tseshi tsiyukaii.
26 Shrue Jesus tyipeyutana, tyana; Tsatsi shikutonimasya. Shrue tyayitsakuiya: Tsika tsatsi e-shrayitsakuiya
27 haiityitsi itye niya towa e-sutyekkuiyanishi. Etyu gowa shrutsityishityia? Hatrutsai dyue cha-iatratyai, she tsaya tseshi dyika hau tsutyu, tyanata: Iatra, Nake, wai
28 mataiku tsaishra ye chutanitra. She tyamashra e tyanata: Tsatsi e-shikunu. She etyu hatsumashuku

- 30 chuwataipunai, shrue tsutyu. Shrue ishika dyika hau tsutyu, tsika emi e taatsakuiya; she tyipeyuta taatsakuiya: Ha, naishityia. Etyu tsatsi tsutyu. Haiyti towa
31 dyue ga-naishityia ga-uwayani e-tsitra? E tania; Tsaya tseshi. She Jesus e-tayitsakuiya: Kaimatsi e-shrayitsakuiya, aitsuwani-kaukitaukuiyana e kanatyti hishrome dyika ai yani Kaunamatsi itye-tshesha dyika ye netyee-
32 kukusa. She hawe kutruwa-tsuku John uitonimi hiyani ye, e tsatsi shiuhimatawanatya, etyu aitsuwani-kaukitaukuiyana e kanatyti tsiuhimatawana; etyu trutyu, shruukachanatyti si yuku, mame tsatsi shruwawataipunaimetyanu emi heya niuhimatawana-kutrusatyishi.
33 Ishika uwaseni trakani. Hau hatrutsai gaama yani tseshi. Wa mataiku chaityi, hake bashruni chupisha e ai nu chaushitotsa mataiku-uatsishitowani, tsitru dyu
34 katrutyishi chaatra, shrue towa kotanitra ushitsi tyiuyani, e ai yuku si tsutyu. Shrue hemaku hitrani naetraku ni hawe ena kaetra ni, ga-umatsityaimishi kowatanitra dyika ye tyayayata, hitrani e-kaetranishi
35 utyawi niya. Shrue kowatanitra ga-umatsityaimishi tyayiyata, e ishike tyushayana, e ishike chaottawa, e ishike yaoni niya tyuyutsana. Shrue tsika na, tsaya
36 tsiyatanishi mina yuku mame naoya kowatanitra tyayayata, she emi taa tsika na e tayatrana. Shrue hamashu tse ga-mutyi tyikuiya, e chatsa: Sa-mutyi
37 niutsitokai-kusa. She etyu kowatanitra ga-mutyi kuukachanatyti, chayania, Towa nawiyaanikunishi tsa,
38 shru nauttawa e nayaawa tsi nawiyaatyikunishi. She tyityata, mataiku tsaishra dyika si tyawii, shrue chauttawa. She mataiku tsaishra yani tseshi hawe
39 tsunyeku ni, tsi kui towa kowatanitra niyatruku? Tania: Kawasa me towa sutsi-me kowatanitra e
40 neyatruku; shrue mika kowatanitra dyika mataiku tsaishra nyewayaaniku, towa kowatanitra hitrani chitye
41 kaetrani niuyanitta-tsiumasa. Jesus tayitsakuiya: Iusi tsidyatranu dyika nu, tsatsi hama trukachana?
Kaatraitya tsa kuushranishi yaoni, towa emi

- shukuna ga-nushika tyiuitrani. Towa Huchani dyika si tsutyu, she sutraya-ana dyika imi ma;tse.
- 43 Emi heya e-shrayitsakuiya, Iusi ga-itye-tshesha niwisa-tyutsana-kutruwatrumasa, e shrue ga-hitrani hau e tsitrani hano niyaapiku. She hautsi towa yaoni dyu kautyaisa kayu-nyeku, etyu hautsi tsainatsima, nieityityuwatsiuma.
- 44 She yani tseshi chayani e Parasai hano ga-uwaseni kakanaty kaatruksi niya e-chatsanishi tyiwittawana.
- 45 E gaika nityata-tsiumasaty, tsi hanowishi niya chaaputsana, she prophet tseshi tyiyukaii.
- 22 E tsika na Jesus tyaipeyuta e tyayitsakuiya
- 2 uwaseni niya, e chatsa: Kaunamatsi itye-tshesha, wa emi eyu rai ga-mutyi uwakuitrani bashruku tyiutrani kushrugayu. Emi wa kowatanitra hake tyayayata uwakuitrani bashruku ye tsiwashutsanishi uwapeotsi; e tsatsi hawe utsutsi e-tyusatya. She tsika na, mika kowatanitra hake tyayayata, tyayitsakuiya, Tsiwashutsanishi powapena, Mu, sa-tyishani haku sitra, sayashratawanishi suwa, e sai tsi haku tsa, uwakuitranibashruku hawe tyekkuma. She etyu tsatsi tsi yatra tyusatya, e yuku tyeeku, ishike gaishra ye, ishika tyishita ye, e mika katanitraniyamishi tayityata, e ganunani ye e-tayatyityia, shrue chuwawana. She etyu rai chutsayawa, shrue gawainityaimishi hake tyayayata e we kayawatratyia sutsi me tyayatra, e gaashityitrashi tayaka. Shrue ga-tanitraniyamishi tyayitsakuiya, Uwakuitrani-bashruku haku tsiutrani, etyu tsiwashutsanishi tsatsi yatra tsaaputya. Emi heya, nake, hiyani dyika ye tyekkuma, e hatsu tsi shruwatyainawatyanyu uwakuitrani-bashruku dyika ye niwashutsanakutrusa. She towa kowatanitra hiyani dyika ye hake tsekkuiya, she hautsi tsiyainawatyishi sai heme tyiwayami, shikaewa sutsi tsaaputyishi e tawa tsaaputyishi, shrue uwakuitrani-gaya gayatanyetyishi niya tyutaa.
- 11 Shrue rai hawe kupuni, gayatanyetyishi kuwakachanii, tsatsi uwakuitrani-wakuni kowakunishi ishike hano

- 12 tyiukacha. She taatsakuiya, Sa-ukini, tsatsi uwakuitrani-wakuni shruwakuni gowa hawe shrupu? She tsatsi itye chatsa. Shrue rai kowatanitra tyayitsakuiya, Piupushityanitta, kamashityi e kashityi ye, shrue yuku piyutsee, e chaatya tsamishityishra hake traawii. Wa ai niyetyikuiyaniku e hachani nyeiushikunutsitaniku.
- 14 She tyiwapeotsanishi naoya tsaapu, etyu tsayayaatawishi hatsue tsaapu.
- 15 Shrue Parasai hano ai si yuku tyekkuiya, e tsi tyiwittawityia gowa e-katsanishi niya nityata-kusatyishi. She kaysimeshityiatyishi hake tauyatanitta, Herodia tsayinimasatyishi hano gayaatse, tyaana: Tsayasomeeshita, siutonimasa hishrome shraimatsishi, e Iusi ga-hiyani kaimatsi niya shayasomeshta, e tsatsi hau shrutsityishitanu, she tsatsi hano kowawi shruwakachanikuiya. Emi heya kowappe, gowa shrutsityishita,
- 18 Caesar dyika aitsuwani aapi itye ta, ku tsa? She Jesus towa sutsi me tseshi tyiwittawa, shrue e-tyayitsakuiya: Tsekoma tyiutanikuiya, kaitutyityia! Hanye aitsuwani sawaka kaukacha. Shrue taikkuimitta ishike sawaka. She tyayitsakuiya: Hau towa kadyatran e towa tsidyatran? Shrue tania: Wa Caesar gashi. Shrue tyayitsakuiya: Emi heya Caesar gashi Caesar hawe niutranitta-kutrusa, e Iusi gashi Iusi hawe niutranitta-kutrusa. Towa kakanaty imi ma tayatra, shrue tu tyitrana, e yuku si tyeeku.
- 23 Emi e tsaashityi Sadakai hano hawe tyeeku. Towa hano tyaanatata ushitoni si dyu uipatyini tsatsi tsanu.
- 24 She emi tyiupatawa tyaana: Tsayasomeeshita, Moses kanata tsa ga-iatratyainu tsi hatrutsai kushito, gatyumu towa ga-okui niwakuitratsiuma, shrue kutsi niya naiatratyiku. She maityana gaya-tyumutyaimishi tuwe sutyekkuiya, e tsaya tseshi tsiwakuitrani kushito, etyu tsatsi ga-iatratyishi ga-okui ga-tyumu ai tyiukkuiyani, she tsika emi taa dyue dyika nu, shrue chami dyika nu, shrue emi e tsika chaetra maityana dyika nu hema.
- 27 Shrue sai ai hamashu kui tseshi kushito. Emi heya, ushitoni si dyu uipatyini dyika towa maityana dyika si

- hau ye emi naokuiku, she sai haupa ga-okuiishi.
- 29 Etyu Jesus tyaipeyuta, tyanata: Kutruwaukusu, she tsatsi shruwittawanishatya Iusi tsidyatrani e Iusi
- 30 tsishatsishi. She ushitoni si dyu uipatyini tsee ni, tsatsi tsayawakuiyitanu, ku tsatsi tsayawakuiyitanittatya. She etyu Kaunamatsi dyika Iusi ga-upseyi-
- 31 tyaimishi-me tsa. She etyu ushitoni si dyu uipatyinishi niya Iusi kutraiminatyishi tsatsi na truukachana? E-chatsa:
- 32 Tu hinome Abraham ga-Iusi, e Isaac ga-Iusi, e Jacob ga-Iusi suta.
- Iusi, wa tsatsi kushitonishi dyika Iusi tsanu, etyu emi
- 33 tsiianishi dyika. Shrue tsi hanowishi kakani mame imi ma tayatra tsayasomeshitanishi niya.
- 34 Shrue, Sadakai hano maku kayatrani Parasai hano kakanityi, chaiwatyami. She towa haityi ishike
- 35 utsitokai-kusu tyiupeta, tsiutanikuiyani: Tsayasomeeshita, Utsitokai dyika haityi yuku tseyatyimishi
- 36 tsiuwayanishi tsa? She e-taatsakuiya: Sai kutra-winoshika niya, e sai kutra-maiani niya, e sai kutra-
- 37 utsityishitani niya Huchani kutra-Iusi niutsimu-shru. Towa yuku tseyatyimishi e tsiyatyuwi tsiuwayanishi.
- 38 E hamashu tseshi emi kushrugayu; towa tsa: Gowa noyu shruitsimuni, emi e mika hano putsimu. Towa
- 39 dyue tsiuwayanishi si nu tsipatrutya sai utsitokai e prophet katsanishi.
- 41 She Parasai hano ai kaiwatyamityi Jesus upetawi tyiwapeta, tayatsakuiya: Christo dyika gowa shruwa-
- 42 tsityishityia? Hau ga-mutyi tsa? E tania: David gamutyi. Shrue tyanata: She gowa emi maianishi niya
- 43 David, Huchani, emi e taatsakuiyasu, e-chatsa:
- 44 Huchani, sa-huchani tsatsakuiya, shrumikawayasa-mashityi ai si nu chukuiya, menashru kutruianatyishi kutraashutyitratsi seyawitrano.
- 45 She tsi David, Huchani tsatsakuiyasu, gowa emi ga-mutyi tsa? She tsatsi itye hautsi ishike mani puta
- 46 nipeyutatyuma, e towa tsaashika si yuku tsatsi na hau chaoyetsa tsi upetawi niupetakunishi.

- 23 Shrue Jesus tsi hanowishi e gaisomeshitanishi
- 2 tyayitsakuiya, tyanata: Tsidyatranikusana e Parasai hano Moses ga-anamatyi ai si dyu chaatyita.
- 3 Emi heya sai tsi kutrayitsakuiyanatyanu, emi towa e-pitrana, e niwatsitokai-kutrusa; etyu bashrumi gaitanishi truwawichawa, she e-katsia, etyu tsatsi
- 4 tsityityiatya. Kaimatsi gayutayani tsipatyase, e kaosa utyityinami, e mika hano gayayushipi ye dyu tsishityikuiyana, etyu noyu tsatsi gayamashitya niya puta
- 5 niyeitsutsana-kusatya. She etyu sai tsi gaitanishetyishi hano niukachakunishi niya e tsa. She anye-kusa gautsayumishi gaacha gayatyityia, e ga-wakunishi hake
- 6 dyu ye gowa-utranishi tsiya gayatyityia, e bashruku dyika ye yani tseshra, e aiwatyami-gaya dyika ye dinya
- 7 amatyi tseshra, e tsishityia-shra dyika ye Gowa tsi niyeityityia-tsawamasatyi, e Rabi neenia-tsiwatrumasatyishi. She etyu, bami Rabi putrayania, she ishike
- 8 kutrayisomeshita, e sai shraya-tyumushi. E bami hau gaishibishra dyu kutra-naishityia penia, she ishike
- 9 kutra-naishityiashi, emi wa Kaunamatsi gaapishi. Ku bami Huchani putraiania, she ishike kutra-huchani, emi
- 10 Christo. She etyu, kutruwataa mame dinya tseshi kutrayaokashani n'taku. E hautsi noyu dinya kuuamashityitanu, nutsia nieitranaku, e hautsi nutsia kaetyitanu, dinya nieitranaku.
- 13 Etyu Eiya! Kutyeema tsidyatranikusana e Parasai hano kaitutyityiana! She Kaunamatsi itye-tseshra hano dyika si shrayaataityia; she tsatsi noyu hau kutyeepusunu, e hake tseepusushi tsatsi shrayiwaheetsitanittyiatya uyupuni.
- 14 Eiya kutyeema, tsidyatranikusana e Parasai hano kaitutyityiana! She kushityi tsaityairumanishi gatrutya hau kutratotsishi, she etyu tuma ayawitutrani niya ka, tsitru amoma-utrani shruwauityityia; emi heya niyaawa-kutrusa mame mina yuku tsichuni utsitani.
- 15 Eiya kutyeema, tsidyatranikusana e Parasai hano kaitutyityia! She kutaa e hatsi dyu sai ai shra kutyekkuiyata ishike puta kutra-utsikumishi dyika hau

- niunutsana-kutrusatyishi niya, shrue e-tsitranu, tsi hishrome shruwatyamutse ga-mutyiyaimishi kutaaputyanu, emi wa dyuyashu shruwatyamutse ga-mutyi shityityia.
- 16 Eiya kutyeema, tsa kutrayakashityishi kutrayatru-tseyana e kutraitsianishi Hautsi tsityumi-katrutya niya kaakaesunu tsatsi tsi haityi tsa; she etyu hautsi tsityumi-katrutya ga-uru niya kaakaesunu, gaityishru kitrakayami.
- 17 Tsa gowa shrunimasatyishi e tsa kutrayakashityishi! She haityi tsishatsi, uru kume tsityumi-katrutya, uru tsityu-tsityitanishi? E tsika, Hautsi tsaapaishi niya kaakaesunu, tsatsi tsi haityi tsa; etyu tsaapaishi dyika dyu tsaashityiakumishi niya kaakaesunu, gaityishru kitrakayami. Tsa kutrayakashityishi! Haityi tsishatsi, tsaashityiakumishi kume tsaashityiakumishi tsityu-tsityitanishi tsaapaishi? She hau tsaapaishi niya kaakaesunu, tsaapaishi e sai tsi ai dyu tsishimishi niya kaakaesu; e tsityumi-katrutya niya kaakaesunishi, tsityumi-katrutya e ai gaya gaamishi niya kaakaesu; e Kaunamatsi niya kaakaesunishi, wa emi Iusi gatsityumi-anamatyi e ai si dyu kakuiyanishi niya kaakaesu.
- 23 Eiya tsidyatranikusana e Parasai hano kaitutyityiana! She shanu e anise e koranto katsi uityimi si ishike yuku shrayaokuiyana; etyu tu shrayatranatyi yuku gayutayanishi utsitokai, towa, shrami tseshi, ayawatyuityi e uhimaty; etyu towa gaika e nitrana-kutrusa e tsika gaika tsatsi we ishika tu e nitrana-kutrusatya. Tsa tsyakashityishi gayatrutseyana kutyeshi washikaatsi shautsishitowapesu e gameyu shushu kutyee!
- 25 Eiya tsidyatranikusana e Parasai hano kaitutyityiana! She ushikatyi e waishitani chaatya shriena dyu shrauyashityise, etyu ai gaya nu utani e tseyatyimi guta gayaty. Tsa-tsikashityishi Parasai hano! Tsaya ushikatyi e waishitani ai gaya nu chuyashityi, emi heya chaatya shriena dyu tsika niuyashityimiku.

- 27 Eiya tsidyatranikusana e Parasai hano kaitutyityia! She tsayatsemi ayatyaitsimishi ma kutyee. Towa kaimatsi chaatya shriena dyu anyume tseshi, etyu gaya ye shumu haashigani guta, e sai tsi adyema tseshi.
- 28 Emi taa trutyu mu, chaatya ye hano dyika uitonimi ma kutyee, she etyu gaya ye uityityitani e sutsishuni kutruwakai.
- 29 Eiya tsidyatranikusana e Parasai hano kaitutyityiana! She prophets gayityaitsimi shraatraityia e kuwautonimishi gaya-mutyaitsimi anye shraya-tyityia, shrue kutrana, Tsi sutra-naishityiashi tseemi yue hama sutyeeanu, tsatsi prophets ga-matsishi niya natraya-matsana-shikusatya. Emi heya noyu shrami shityishityi-kutyityia, prophets kuwawanatyishi ga-iatratyaimishi kutaapu. She kutra-naishityiatyaimishi gautyimetyishi trataanaty. Shruwi kutaapu! Shikaatyu ga-iatratyaimishi kutaapu! Gowa shruwatyamutse tsyatanishi si yuku natraapayu-kutrusa? Emi heya, mu, prophets e kutonimasatyishi e tsidyatranikusana nyewayatani-shrawatruma; shrue towa dyika si mika nuwawana-kutrusa e shukuchatsi dyu niyewapukakatsanitta-kutrusa, e mika kutra-aiwatyami-gaya ye niyashayana-kutrusa, e tsaashityitra ma naupashana-kutrusa, emi heya sayu uitonimishi matsi, gaishibishra dyu tsiwawatsemu tsaya-tranatyishi, uitonimi tseshi Abel si yuku Barachias ga-mutyi, tsityumi-katrutya e tsaapaishi ai sunama shrauttawanishi Zacharias hema, ai dyu nutrashi-kutrusa. Kaimatsi shrayitsakuiya, sai tsi towa wai kikatsanishi hano ai dyu nutrashikusa.
- 37 A, Jerusalem, Jerusalem, prophet tseshi shruwanatyishi e hawe kutraiwayatannittatyishi yaoni niya shruwayutsanishi, hatsu wa shikutsipu kutra-iatratyaimishi niwatyau-sinishi, hanai ga-washityitratyaimishi kowasu naya ye tsiwatyasushi me, etyu tsatsi kutrutsiputya. Mu, kutratrutya tu tsa nyeiwakuiyanitta-kutruwatrumasa. She e shrayitsakuiya, tui si yuku tsatsi na niukachana-tyiomasatya, menashru

kutranatya, Uamashitani tsa, Huchani E-gashi niya hawe tsutseshi.

- 24 E Jesus tsityumi-katrutya si tyumu, e ai yuku si gaani, e gaisomeshitanishi hau tyiwatseeku, tsi-tyumi-katrutya katrutya piukachana-tyumasa. She etyu Jesus tyayitsakuiya, Sai tsi towa truwakachana? Kaimatsi shrayitsakuiya, Tui tsatsi ishike yaoni puta tsayatushiputyishi nietyukunu, tsa putsatsishi.
- 3 Shrue Olive kotyu si chukuiya ni, gaisomeshitanishi nowe hawe tyeeke, tyana, Kuwappe hama towa e naitraku, e tsi gowa tyiemi n'taku hawe tsunye-shru ni, e gaishibishra kuinaotta ni? E Jesus tyayipeyuta e tyayitsakuiya, Bashru-trusa tsa hau hano yukuma nyeitrutse-kutruwatrumanishi. She naoya E-seshi niya hawe n'tyeeekusa n'tranakusa, Tu hinome Christo suta; shrue naoya tsa yukuma nyeitrutseyi-kusa. E apatramuni e apatramuni niya tsiutyuminishi natrakani-kutrusa. Bami gowa-truwautra. She sekka towa e naitranaku; etyu kuinaottanishi tsatsi na tsanu. She hano ishika hano dyika ganashiyani nayatyityia-kusa, e rai-itye-tseshra ishika rai-itye-tseshra dyika, e matyuku, e hatsi-uwukutsishi hatyiku e nu e-naetraku. Etyu sai tsi towa niya ayama tseshi menashru haikami n'taku. Shrue hau niyeyatana-kutruwatrumasa sutsime ayatyitani niya ka, e niyewana-kutruwatrumasa, e E-seshi niya sai hano niwaiyanisa-kutruwatrumasa. E shrue naoya tse nanachupatsa-kusa, e hau nayakuyatyia-kusa, e nowaiyanisa-kusa. E naoya tsa tsa kaimatsishi prophet tseshi dyu nautraashru-kusa, e naoya tsa yukuma nyeitrutseyi-kusa. She sutsishuni nitaanikunishi niya, naoya tsa ga-utsumunishi nye-yaishityito-tsiwatruma. Etyu kuinaottani hema kaushigitsanishi, emi nitraguku. E towa tawa-mani, ityetseshra niya ka, gaishibishra sai hema shra nikatsaniku, sai hano dyika shityishityiku n'takunishi niya ka. Shrue menashru nuinaottaku.
- 15 Emi heya, prophet tseshi Daniel katsanishi tutseshra katsayawishi tsityumishra si kuchanishi shruu-

- kachanatyi, (tsidyatrani kuukachanishi piwittawa), shrue menashru Juda hatsi tseemishi kotyu ye paapayyu, katrutya dinyi dyu tseemishi tsi haityi katrutya si nayawakusatyiishi niya bami hawe si nu petya. E tsaishra dyika ye tseemishi bami hake si ga-wakuni paai. Etyu eiya! emi eyu tsaashityi tsikuunishi e gayashityekuiyatyishi. She etyu amoma pitrana, tsa kuku, ku tsa uanatrani-tsaashityi emi e nutraapayukutrusatyishi; she shrueshru menashru mame sutsime ayatyitani n'taku. Towa tsa emi hama hemaku tseshi gaishibishra e-kaetrani si yuku wai hema, tsa, tsatsi na hama emi e-n'tyekkunu. E tsi tsa we tsaashityi drutsitru tsaitranatyanu, tsatsi tsi sinani nitragukunu, she etyu tsaayatawishi ga-fruttsi niya we tsaashityi drutsitru neyatraniku. She tsi emi eyu hau kutrayitsakuiyanu, Tu ai Christo, ku, Wa ai, bami truhima; she tsa kaimatsishi Christo tseshi hawe n'tyekkuiyatakusa, e tsa kaimatsishi prophet tseshi, e hawe e-n'taapukusa mame tsi imi me tseshi e tsi tyiemi-utrani, emi heya, tsi itye tsanu, tsaayatawishi puta yukuma ayatrutsei niya. Mu, tsa na e-kaetrani yuku yani shrawappe.
- 26 Emi heya tsi kutrayitsakuiyana: Mu, tsatdyau ai ga, bami hake tyeeekuma. Mu, wa ai kaatya gaya ai gaachu, bami truwahima. She emi butruwaishityi yue ha ni kumusushi, e buniya ye tsiukumashratsita, tsika emi taa n'taku hano ga-mutyi hawe tsunyekunishi.
- 28 She haityitsi shumu gaashra, tsika emi ai mashawi naiwatyase-kusa.
- 29 Etyu we tsaashityityani sutsime ayatyitani tu shrue eshru hawina oshratra tsamishityitsi naitraku, e tawatra tsatsi numashratsikunu, e shityita howaka si nu pepeniku, e howaka tsishatsishi nyeyatsiwukutsana-tsiwatrumasa. E shrue hano ga-mutyi ga-tyiemi tseshi howaka si nu mashra naitraku. Shrue eshru gaishibishra dyu sai hano n'tratakusa, shrue niukachana-kusa hano ga-mutyi howaka ga-henatyi dyika si dyu hawe tsunyekunishi, tsishatsishi niya e mame naoya uamashitani niya. E ga-upeseyityaimishi shra

n'yayataku, e mame nyeitsanaimeku, uputsi niya, e tyana shukuna si e howaka sai ai shra si gayaatawishi niwatyamekusa.

- 32 She fig hitrae uwaseni dyika si chuwatyumitrana: Tu na ga-tsaashityuma shawutsi e masani hawe si
33 tsityitani, shrutonimasa kashraityi haweku tsa. Tsika emi taa, sai tsi towa shruwakachanaty, putonimasa
34 haweku kaetranishi, bato tsiamu hawe ena. Kaimatsi shrayitsakuiya, towa kikatsanishi hano tsatsi nitraitra-
35 tyukusatya menashru sai tsi towa e-kaetra. Howaka e gaishibishra nitrayatyukuu, etyu sa-mani tsatsi nitrai-
36 yatyukusatya. She etyu, we tsaashityi e we ura dyika, tsatsi hau hano kutonima, tsa, tsatsi puta Kaunamatsi
37 ga-upeseyiyaimishi, e tsatsi lusi ga-mutyi, etyu nowe Naishityia tseshi. She hano ga-mutyi hawe tsunyeku-
38 nishi, wa emi Noah gaapi tsaashityi kushigayu. She tsa na kuichumuni tsaashityi tyaapetata e tyashikaty-
39 kuyana, tayawakuiyita e tayawakuiyitanitta, Noah kanue dyu kupuni tsaashityi hema, e tsatsi chuwatyu
40 menashru kuichumuni e sai haupa yuku tsaitrutseyi, emi taa hano ga-mutyi hawe tsunyekunishi n'taku. Emi
41 eyu, dyue hatrutsai tsaishra ai n'taakuu; ishike yuku tsaayutsee, etyu ishika gaatyu. Dyue ku awayani dyika
42 n'trawayakuu, she ishike yuku tsaayutsee, etyu ishika gaatyu. Emi heya truwayukai, she haityi tsaashityi
43 kutra-huchanishi hawe si tsunyekunishi tsatsi shrutoni-
44 masatya. She etyu towa putonimasa, Tsi katrutya yani tseshi haityi uashityumi kuchawaya hawe tsunikunu
45 kutonima, gai nyiushityiku, e tsatsi ga-ama nuheetsi-
46 kunu utroshityi. Emi heya, trutyumu haku tani; she tsa emi e shrutsityishitani, ai ura dyika hano ga-mutyi hawe
47 si tsunyeku.
- 45 She hawi tsiuhimatyishi e kutonimishi kotanitra tsa, wa ga-yani tseshi ga-ama si dyu itye tsiutranitty
46 emi heya chitye upbewi hawe nyewatraniku? Gaiuiyee-
47 tyu we kotanitra yani tseshi hawe tsutsi tsiyainaku taa tsekkuiyani. Kaimatsi shrayitsakuiya, sai heme gashi
48 ai dyu kuwatsa nitra-tsiuma. She etyu, tsi towa

- sutsime kotanitra ga-winoshika dyika e-katsanu: Sa-yani tseshi hawe tsunikunishi yuku tsityikuiya,
49 shrue shru mika kowatanitranishi gayashukuiyani,
50 e roku tsayatyita gaashikatyikuiyanatyanu, tsa emi e tsinaitrani tsaashityi e tsa kutonimi ura dyika, towa
51 kotanitra ga-yani tseshi hawe tsunyeku, e sai si nu nityatsinai-tsiuma e kaitutyityia ye nitasha-tsiuma.
Ai niyetyikuiyaniku e hachani nyeiushikunutsitaniku.
- 25 Shrue Kaunamatsi itye-tseshra nushrugayuniku, katsi masitra ga-anatranishi kuwauyetyeyawatyishi e
2 naudyatrakunishi tyiyaityamee hake tyemunityishi. E taama tsatsi kowakunimasatya e taama tsi tyiutoni-
3 masa. She tsa kowakunimasatyishi ga-anatranishi kowauyetyeyawatyishi tsatsi hau yui asaityi chuwashi-
4 tyishii. Etyu kutonimasatyishi shipuna niya hau yui asaityi ga-anatranishi tyayashityishimitta. Shrue nau-
5 dyatraku yuku tsityikuiyani, masitra sai tyepatatani e dyepatyi, etyu suna gapushu ni hau tyushigaitsa, Mu,
6 naudyatraku, hawe piwataime! She masitra sai haupa tyepatyuni, ga-anatranishi chuwatyikame. E tsa
7 kowakunimasatyishi kutonimasatyishi tyayania, Kutra-asaityi gawachani, she sutra-anatranishi shikayaino-
8 shitata. She etyu kutonimasatyishi tyayipeyuta tyana, Tsi shru tsi tsa washu hishrome e hinome dyika
9 tsanu, nake, tsishityiashi dyika ye tyekkuma, shrue noyu tranatana. Shrue ai si yuku kayaniyeetyi,
10 naudyatrakunishi hawe tsutyu, shrue sai haku kowau-
11 tranishi hake haupa tyiepu tsawakuitrani bashruku ye, shrue tsiamu chaasha. Shrue hatsuma kaetrani, mika
12 masitra hawe si tyeeku, tyana, Yani tseshi! Yani tseshi! Gayaatawi! Etyu shrue tyayipeyuta, tyanata,
13 Kaimatsi shrayitsakuiya, tsatsi shrayitrunima. Emi heya truwayukai, she hano ga-mutyi hawe si tsunyeku-
14 nishi haityi tsaashityi ku haityi ura tsatsi shrutoni-
15 masatya.
- 14 Emi taa tse, hatrutsai ishika tiye hatsi dyika ye tsunyeku ni, ga-tanitranyaimishi tyiwaapeotsa, shrue
15 tsi gaishimishi sai tsi ai tyaiwawishani. E haityi ishike

16 taama tsiwityimi tyiuchani, e haityi ishike dyue tsiwityimi, e tsika haityi ishika ishike tsiwityimi, nowaina hatsumaku shikau-ityeetsanishi taiwachani, e shrue
 17 shru ai yuku tsutyu. She tu haikamiku taama tsiwityimi kuishitawishi tyumu, shrue towa tayayaku, she
 18 tsika na taama tsiwityimi ai dyu chuwitra. Emi taa tsika, dyue tsiwityimi kuishitawishi tsika ai dyu dyue
 19 chuwitra. Etyu ishika, ishike tsiwityimi kuishitawishi tyumu, shrue hatsi dyika nu chaoshitotsa, shrue ga-
 20 yani tseshi ga-sawaka ai nu chuwakucha. Shrue maiku ai si yuku towa kowatanitra gaya-yani tseshi hawe si
 21 tsutyuni, sai tsi niya hawe utranityi tyiwapeta. She taama tsiwityimi kuishitawishi hawe tsutyuni, tsika
 22 taama tsiwishityimi hawe chuishitaiku, tyanata: Yani, tseshi, taama tsiwityimi tyuishityi, mu, ai dyu taama
 23 tsiwityimi suwitra. Ga-yani tseshi e-taatsakuiya, Tawae, tawa e tsiuhimatyishi kutanitra kuta! Tu
 24 hatsue dyika kutru-himatyishi me, tsi naoya dyika kuwatsa nitra-shroma. Kutra-yani tseshi ga-uishityaani
 25 hau upu. Shrue dyue tsiwityimi kuishitawishi hawe tsutyu, tyanata: Yani tseshi, dyue tsiwityimi tyuishityi,
 26 mu, dyuishu tsiwityimi ai dyu suwitra. Ga-yani tseshi e-taatsakuiya: Tawae, tawa e tsiuhimatyishi kutanitra
 27 kuta! Tu hatsue dyika kutru-himatyishi me tsi naoya dyika kuwatsa nitra-shroma. Kutra-yani tseshi ga-
 28 uishityaani hau upu. Shrue tsika, ishike tsiwityimi kuishitawishi hawe tsutyu, tyanata: Yani tseshi,
 siutoni hatsumaku shitutsi kutyeshi, shruwaityita tsa emi ai shrautyimishra, e shiwayasu tsa emi hawe shru-
 shramatsitanishra ye; she suputsani, shrue siumu, hatsi dyika nu kutra-tsiwityimi suwakucha. Mu,
 kutrashi kutra. She etyu ga-yani tseshi tyipeyuta, taatsakuiya, Sutsime tsiusa kotanitra kuta! Shrutoni
 suwaityitanishi tsa ai sa-utyimishra, e si-watyasushi tsa ai suishramatsitanishra ye; emi heya gaika sa-
 sawaka sawaka ai uishitani ai nishita-shru, she hawe si tsu-si sawaka sashi e tsika kaushitanishi ai dyu
 kayamishi si niushita-si. She emi heya pusatyutsana

29 towa ishike tsiwityimi, shrue katsi tsiwityimi kui-shitaikkuiyanishi piushityitta. She sai heme hauts
 kuishitaikkuiyanishi nyiwashityityiku, shrue niwimu-tsiuma, etyu hautsi tsa gashra, e meyu etse tsi gash
 30 nyiesatyutsiku. E tsa tsishiyaukuiyanishi kotanitra chaatya tsamishityitsishra ye niutyikumi-kutrusa
 Ai niyetyikuiyaniku e hachani nyeiushikunutsitaniku.
 31 Etyu hano ga-mutyi hawe si tsunyeku ni, ga-uamashitani niya e sai heme tsiyumishi ga-upeseyi-
 tyaimishi niya, emi eyu uamashitani ga-kuiyanishra ai dyu nukuiyaku, e ai yani shra sai hano naiwatyame-
 32 kusa, shrue nyiyatakuuyaku kanieru gawaa garawashi dyika si yuku kanieru gayatawishi me; she kanieru
 33 shrumikawaya nu niyataku, etyu garawashi ishuya nu niyataku. Shrue Rai tseshi ga-shrumikawaya nu
 34 tseemishi nyeytsakuiyaku Tuwe, sa-naishityia kutru-wakutsanishi, chuuiyaana itye-tseshra gaishibishra ga-
 35 matsaishra kaetrani haku kutraiwatranittyishi; she siyamashityi tyutyishana, si-panoshityi tyuushikatana,
 36 tsayatanyei suta tyushutsana, hanami suta e tyuwakuna, shikuwasaty tyiutanye ye, utsitani si-chupi e
 37 hawe kutyeeku. Shrue shrami tsaaputyishi nyipeyutana-kusa, trana-kusa, Huchani hama shiyamashityi
 38 shraukachana e shra-tyishana? Ku shipanoshityi e shraishikatana? Hama shayatanyei shraukachana e
 39 shraushutsana? Ku hanami-kuta ni e shrawakuna? Ku hama shraukachana kutruwasaty ku utsitani
 40 shraachupi e shrautanye ye? She rai tseshi nyeyipeyuta-tsiwatruma nyeytsakuiya-tsiwatruma, Kaimatsi
 41 shrayitsakuiya, hatsumaku ishike towa drusishu haityi sa-tyumutyaimishi e-shraiwatranittyia, tsika emi hi-
 42 nome hemaku e-tuitrana. Shrue tsika ishuya ai nu tseemishi nyeytsakuiyaku, Sutsishuni kutraityupinai-
 43 mishi, hinome dyika si yuku tyeekuma, hake ai shruwatyamu e ga-upeseyitanityaimishi haku tsaiwatranittyi-
 shra tsiyakamitse tspashi ye nu. She si-yamashityi e tsatsi tutyishanaty; si-panoshityi e tsatsi tuushutsanaty;

hanami suta ni tsatsi tuwakunatya; shikuwasatyi e
 44 utsitani si-chupi, e tsatsi tutanyetya. Shrue tsika
 nyipeyutanakusa, natranakusa, Huchani, hishrome
 hama shraukachana shiyamashityi, ku shipanoshityi ku
 shayatanyei, ku hanami kutaa ni, ku kutruwasatyi, ku
 45 utsitani shra-chupi, e tsa shrawikashanaty? Shrue
 nyeyepeyutaku nyenataku, Kaimatsi shrayitsakuiya,
 hatsumaku ishike towa drusishu tseshi tsatsi e-
 shrayiwatranittya, tsika hinome tsatsi e-tuitranatya.
 46 She towa tsiyakamitse utsitani dyika ye n'tyeekusa,
 etyu shrami tsaaputyishi tsiyakamitse iani dyika ye.

26 She e-chaetra, Jesus sai tsi towa mani gau-
 2 naottani, gaisomeshitanishi tyayitsakuiya: Shrutoni-
 masa dyue dyika nu tsaashityi si uiatyuni bashruku
 n'taku, e hano ga-mutyi hau nyekuyana-tsaomasa,
 3 shukuchatsi dyu niyepukakatsanaku. Shrue yani
 tseshi chayani tsaaputyishi e tsidyatranikusana e hano
 dyika tsaya tsaaputyishi chaiwatyami Caiphas tsaania-
 4 tyishi yani tseshi chayani ga-ama dyika; e tyaatsia
 gowa Jesus tsiuishikumashityi nityattakusatyiishi e
 5 naottawa-kusatyiishi. Etyu tyaana, Tsatsi bashruku
 tsaashityi dyika, tsi shru tsi hano ganashiyani tsaya-
 tranu.
 6 She Jesus Bethany gaapi, Simon leper tsiwawasa-
 7 tyishi ai ga-ama tyaa, kuitsa hawe tsutyu, alabaster
 dyuni niya tsityumishi ayaitani hawe chushitaikku,
 8 shrue ga-nushika dyu tyiwayani kauyetaukuiyani. She
 gaisomeshitanishi towa kuukachanaty tsatsi tyiwa-
 shranitya tyaana: Tsi haityi niya towa tsiuyataani?
 9 She towa ayaitani naoya niya niushaniku, shrue amome
 tsaaputyishi nyewachaniku. She Jesus kuwittawani,
 10 tyayitsakuiya: Tsekoma towa kui-tseshi shrupakatai-
 tyia? She towa tsitanitrani e-shikutrani. She amome
 tsaaputyishi dyutsishrutse kutrayayaa, etyu hinome
 12 tsatsi dyutsishrutse kutruwatatsa. Shrue towa ayaitani
 sini dyu shikuwayanittyishi haku shikuutrani
 13 nyetyaitsime-shikaomasatyishi. Kaimatsi shrayitsa-

kuiya, haityitsi towa tawa-mani tsi katsanishra sai
 gaishibishra dyu, tsika towa kui-tseshi e-tsitranishi
 utyumityishi niya niupetaniku.

14 Shrue katsi dyue tsitra ga-umatsityaimishi si, ishike
 Judas Iscariot E-tya, yani tseshi chayani dyika ye
 15 tsutyu, e tyayitsakuiya, Tsi nyeeptyumasa, shrue
 hinome hau nyeiwatyi-shrawatruma. Shrue chami-ya-
 16 katsi shamutsishi sawaka tyiyasitranitta. She ai si
 yuku tyiypatyikuiya gowa itye hau nikuyakunishi.
 17 Shrue tsa kashratyi gayatsishi semita bashruku
 ishike tsaashityi dyika, ga-umatsityaimishi Jesus dyika
 hau tyeeku tania: Hatyi haku piitrana-tyuwatruma
 18 towa bashruku uyatawi? Shrue tyayitsakuiya: Tsaashi-
 tyitra hake tyeekuma haityi hatrutsai dyika e-nyenia-
 kutrusa, Tsayasomeshita kanata, Suityimishi hau
 seetsi, uiatyuni bashruku kutra-ama dyika sa-umatsi-
 tyaimishi e hinomeai bashruku niwautra-shikuwatruma.
 19 She ga-umatsityaimishi emi e-tyitrana gowa Jesus
 tsayayanikuiyashi; e uiatyuni bashruku haku tyitrana.
 20 Shrue shapuka ni, ai si nu chukuiya, katsi dyue
 21 tsitra ga-umatsityaimishi tseema. E gaapetyi, tyanata:
 Kaimatsi shrayitsakuiya, ishike hau ye emi kutaapu
 22 hinome nikuyatyuma. She mame ayamatyusa, shrue
 23 sai haupa ishika na tania; Huchani, Aku hinome? E
 tyayipeyuta tyanata, Waishitani dyika nu ishikawa si-
 shikumetanutyutsishi, emi wa hau nikuya-shikuma.
 24 Hano ga-mutyi emi e tsaudyatranatyishi emi taa
 tsunyeku, etyu eiya tuwa hatrutsai hano ga-mutyi hau
 nikuyakunishi! Mina tuwa hatrutsai tawa niutraniku
 25 tsi tsa tsiianu. Shrue Judas hau tsikuyanishi tyipeyuta
 tyanata: Tsayasomeeshita, Aku hinome? E taatsakui-
 ya: E shratsa.
 26 E gaapetyi Jesus semita tyita, tyiunamatyi,
 chaotsayutsa, e umatsityaimishi tyayiwachani e
 tyanata: Chuwauyetyeyawa, traape; towa sa-sini tsa.
 27 Shrue ushikatyi chayaawi tsiunamatyi tyayiwachani,
 28 tyanata: Towa si haupa traashikata; she towa
 tsiushranishi sa-matsi tsa, wa naoya kuwatsi niya

- 29 tsiwatsemuni, heya ukitsishi uwataipunaimi. Etyu e-shrayitsakuiya, tui si yuku towa mataiku kiwa tseshi si tsiuitranishi tsatsi na niishika-shikunu, menashru we tsaashityi hama natsi tseshi wa ai sa-naishityi ga-itye-tseshra dyika nutraashikata-shrusa.
- 30 Shrue kowatrutyiatyi Olive kotyu ye tyeeuku.
- 31 Shrue Jesus e-tayitsakuiya: Sai haupa nyeyanachupatsi-kutruwatrumasa towa gapushu, su-tsi niya; she emi e tsidyatrani,
Kanieru gawaa niuppaiti-si, shrue tsiwatsishi kanieru sai ai shra nushramatsaku.
- 32 She etyu tsika na dyu sipaty ni, Galilee ye, hishrome dyika ai yani, tsunye-si. She Peter tyipeyuta e taatsakuiya: Bato tsi sai hano shrutsi niya nyeyanachupatsi-tyiwatrumasanu, tsatsi hama hinome niyanachupatsi-shityaomasatya. Jesus e-taatsakuiya: Kaimatsi shraitsakuiya, towa gapushu, tsa na kowaku kushigai-tsani, chami-ya wa nyenata-shru tsa tyunimishi.
- 35 Peter e-taatsakuiya: Bato tsi ishikawa tutraashitoniku, mame e tsatsi nyenata-shikunu tsa shranimishi. Emi tsika taa sai umatsityaimishi tyana.
- 36 Shrue Gethsemane ai tsaanimasatyishra Jesus e ga-umatsityaimishi hau tyeetyu, e umatsityaimishi tyayitsakuiya: Tui si nu chaata, mena hinome yuke tsunye-si ai amoma nitra-si. She tyayitrutse Peter e Zebedee dyue ga-mutyityaimishi, shrue mame ayamatsi e ganashiyani tyitra. Shrue tyayitsakuiya: Samaiani mame ayamaku, hushitoni ye. Tui tyeeemi e uyukaini kumatsanitta. Shrue drumu yuku tsutyu e kowawi niya nu chaatsi, amoma tyitrani e-chatsa: A, Sa-naishityia, tsi emi e n'takunu, towa ushikatyi piyatyu, hinome dyika si; she eku etyu tsatsi sa-uyanishi niya ka, etyu emi kutra-uyanishi niya.
- 40 Shrue umatsityaimishi dyika hau si tsutsi, tyiwatyaina tsepaiityi, e taatsakuiya Peter: Tsi, gao tsatsi ishike ura uyukaini niuatsanityuma? Truyukai e amoma pitra, tsa niyetana-kutrumasatyishi niya ka. Kaimatsi maiani mame gauttuwi, she etyu sinani tsatsi tsishatsishra.

- 42 E tsika na hamashutse yuku si tsutyu e amoma tyitrani e-chatsa: Sa-naishityia, tsi towa ushikatyi tsa niyetyikunu, tsi tsa sishikatya, kutra-uyanishi e-paaitra.
- 43 Shrue hawe si tsutsi tsika na tyuwatyaina tsepaiityi, she mame tyepakuiyana. E tsika na tu tayatra, yuku si tsutyu, e chami-ya tse amoma tyitra, tu emi e tsika na e-chatsa, Shrue ga-umatsityaimishi dyika hau tsutyu e tyayitsakuiya: Gaityishru tyeepaiyi e chuwanatrania. Mu, Shru ura hau tsaatsi, e shrue hano gamutyi kokitsityia gayamashityi dyika hau tsaakuyana.
- 46 Dyu tyeeptyuni shraoshru n'tyeeuku. Mu, hau shikukuyanishi tuwe tsaatsi.
- 47 Tu na katsani, mu, katsi dyue tsitra si, ishike, emi Judas tseshi, hawe tsutyu, e tsi hanowishi hawe tyayitrutse, ishipari e upaiti kaatyeyanaty, yani tsaaputyishi chayani e yani tsaaputyishi hano dyika si.
- 48 Shrue hau tsikuyanishi utyiemitrani tyayiwatrania tyanata: Hautsi haityi si-utsutsanu, emi tsa; pityata. She tu haikamiku Jesus dyika hau tsutyu, tyanata: Gowa tsi, Tsayasomeshita. Shrue tyiutsutsa. She Jesus e-taatsakuiya: Sa-ukini, tsi kutiyushanishi e-pitra. Shrue hawe tyeeuku e Jesus tsityataty tyiyutsee.
- 51 E mu, haityi Jesus ai tseemishi kamashityi dyu e-tsitrani, ga-ishipari dyu tyuku, shrue yani tseshi chayani ga-tanitrani tyupaitsa, tsippe yuku tyuttra.
- 52 Shrue Jesus e-taatsakuiya: Kutra-ishipari ga-uchupishra hake si nu pipunai; she sai haupa ishipari kayaakunishi, ishipari niya yuku nyiwakayawiku. Ku trutsityishita, sa-naishityia nowapeotsa-sinishi tsa itye sutyeshi, e shrue eshru katsi dyue tsitra yuku gowatsikumishi Iusi ga-upeseyityaimishi hawe niuyatani-shikuma? Kume emi gowa tsidyatranishi e-naitraku,
- 55 sekka towa e-n'tyeeuku? Emi eyu ura Jesus tsi hanowishi dyika tyayitsakuiya: Hawe tutyeeuku kuchawaya nityata-kutrusatyishi me, ishipari e upaiti shratyeyanaty nityata-tyumasa? Na no tsama tsityumi-katrutya ai si si, seyasomeshitani, e tsatsi tyutyatya. She etyu towa sai heme prophet tseshi dyika si tsidyatranishi

shru kaimatsi kaetra. Shru sai ga-umatsiyaimishi tu tsitrangatya tyaapayu.

- 57 She Jesus tsityatatyishi yuku tyiyutsee chayani yani tseshi Caiaphas dyika ye; ai tsidyatranikusana e tsaya tsaaputyishi kaiwatyamishra. Etyu Peter Jesus ai kaatya tiye ye hamashu chaanitrutyaya, chayani yani tseshi ga-ama ai yani dyika hema, shru hau tyeepu, e kowachani tseema ai si nu chukuiya, kuinaottanishi ukachani. She chayani yani tsaaputyishi e sai kaiwatyametyishi tsa kaimatsishi shityishityiku tsaaputyishi tyuwatyaipana emi heya niyumutyitsana-tsiumasatyishi; she etyu tsatsi tsi tyiyainawatya, bato tsa kaimatsi shityishityiku naoya hawe tyekkuiyiku. Etyu hamashu tse dyue hawe tyeevu tyanikuiya: Towa hatrutsai kanata, Hinome itye Iusi ga-tsityumi-katrutya punyesi, e chami saiku si naatra-si. She chayani yani tseshi dyu tyutatyu, e Jesus taatsakuiya: Tsatsi tsi nyeyapeyutatru? Tsi emi towa hishrome dyika shityishityiku tsitrano? Etyu Jesus maku-tyu. Shru chayani yani tseshi tyipeyuta tyanata: Tsiianishi Iusi niya ka shraukashitaya, niwapetyuwa-trumanishi tsi hishrome emi Iusi ga-mutyi Christo kutyeshi. Jesus taatsakuiya: E shratsa. She etyu shrayitsakuiya, tui yani niukachana-kutrusa hano ga-mutyi, Itye shrumikawaya si dyu ai nikunishi e howaka henaty dyika hawe tsunyekunishi.
- 65 Shru chayani yani tseshi ga-wakuni chaoshratsitsa tyanatani: Sutsi-me kotsetatya! Tsekoma mina shityishityiku shikuwatsipu? Mu, shru sutra-kani sutsime e-katsanishi. Gowa shruwatsityishityia? Tyipeyutana tyana: Upinaini ushitoni tsa. Shru kowawi tyishuputsana e tyiutyuwitsana, e mika gayamashityi niya tyiutyishatsana, tyanatata: Gayityiemitra, Christo kuta, hawi kutru-tyishatsanishi.
- 69 E Peter katrutya ai yani chaatya si tyaa. Shru maku-tsa hawe tsutyu e taatsakuiya: Tsika emi hishrome Galilee-me Jesus shru-tyisutyu. Etyu sai haupa ai tseemi tsatsi kaimatsishi tyanatasu: Tsatsi shikutonima tsi shranatanishi. E chaatya ai katrutya si

- kouameshityishi ye kumuni ishika tyiukacha, shru tyayitsakuiya ai tseemishi: Towa hatrutsai tsika emi Nazareth-me Jesus kuutyisutyu. E tsika na chaakaesunishi niya e katsa: Tsatsi he hatrutsai shikunima.
- 73 E hatsumashu ai si tseechanishetyishi hau tyiwatsekkuiyi e Peter tania: Kaimatsi, trutyumu emi ai si kuta, she shratsanishi niya kutyi-mashrutsita. Shru shru sutsime tyutsetatyu, e chaakaesu: Tsatsi he hatrutsai shikunima. She tu haikamiku kowaku tyushigaitsa.
- 75 She Peter ee-tyu Jesus e-katsanishi mani: Tsa na kowaku kushigaitsa ni chami-ya, wa nyenata-shru, Tsa tyunimishi. Shru si tyumu e mame chatyikuiya.
- 27 She gayutse kaetrani, chayani yani tseshi e hano tsaya tsaaputyishi chaiwatyami, Jesus dyika gowa naottawa-kusatyiishi. E tsiupashityanittatya, e yuku tyiyutsee, e Pilate dapopo tseshi ye hau tyikuyana.
- 3 Shru Judas, hau tsikuyanishi, Jesus niyemutyitsawa-tsiumasatya kuitawanaty kuukachani si chuupakutsa e shru chami-ya katsi shamutsi sawaka chayani yani tseshi e tsaya tsaaputyishi hau si tyisha, tyanasu: Sokitsa, tsa gapinainimishi matsi hau si-kuyanishi niya. Etyu tania: Tsi haityi he gowa sutaa. No he trutsitawa. Shru shamutsi sawaka tsityumi-katrutya ye nu chaukuiyawu, shru si tyumu e ai si yuku tsutyu e chutotya. E chayani yani tsaaputyishi shamutsi sawaka chuwaushitawa, shru tyana: Towa tsatsi itye uishitanishra ye nu niushitanikunu, she matsi kayamishi niya tsa. Shru heya tyatsia e dyuni kowauityityia gaatsitya emi heya tyanatana, nanami hano ai nu ai-ityaitsimi niya. Emi heya we tsaishra tania, Matsi
- 9 tsaishra, mina wai. She prophet tseshi Jeremiah e katsanishi e-chaetra, tyanata:
- E chami-ya katsi shamutsishi sawaka chaukuyawa, towa tyityuminishi tsityu-taaitranishi, towa emi hatsue Israel ga-mutyiyaimishi tu me tsityu-tyitranityi; e dyuni kowauityityia gaatsitya towa tyaiwakuita, emi e Huchani shiku-yanikuyanishi.

- 11 She Jesus, dapopo dyika ai yani si chutyatsi, e dapopo tyupeta tyanata: Gao emi hishrome Horiyu dyika Rai tyuta? She Jesus e-taatsakuiya: E shratsa.
- 12 E chayani yani tsaaputyishi e hano tsaya tsaaputyishi tyiupinaimittatyishi tsatsi tsi tyamashra. Shrue Pilate e-taatsakuiya: Tsatsi tsi traka hatsu tsi kutyi-upinaimetyishi? E tsatsi tyipeyuta, tsatsi ishike mani puta;
- 14 emi heya dapopo mame imi ma tyitra. She emi e bashruku kaetyita ni, dapopo emi e chayukai ishike tsiutsitani atoinaimi, tsi hanowi dyika ye, haityi tsiwatsiputyishi. She emi eyu ai tyuwachu mame tsaanimasatyishi tsiutsitani, Barabas tsaniatyishi.
- 17 She emi ai kaiwatyametyi, Pilate e-tyayitsakuiya: Haityi si nyewakuyani-shrawatruma, Barabas ku
- 18 Jesus, Christo tsaniatyishi? She tyiutoni hau tsakuyanatyishi ukeso niya ka. E tu na ayataniykiyani anamatyi ai si dyu gaapi, ga-okui hawe tyikuiyani taatsakuiya: We kuitonimishi hatrutsai niya bami hau chayupunai, she wai mame tsi naoya sunatyume,
- 20 hitseshi niya, towa hatrutsai kutsi niya. E chayani yani tsaaputyishi e tsaya tsaaputyishi tsi hanowishi tyuwakashitaityia Barabas uitani, e Jesus uttawi. She etyu dapopo tyayipeyuta tayitsakuiya: Haityi towa dyue si nyewakuyani-shrawatruma kutruwatsipu? Shrue tyana: Barabas. She Pilate tayitsakuiya: Shrue emi kui nitra-si Jesus, Christo tsaniatyishi? E sai heme tania:
- 23 Shukuchatsi si nu peetotyana. She dapopo tyanata: Tsekoma? Tsi kui sutsi tseshi tsitra? She etyu mina mame tyiwashigaitsita: Shukuchatsi si nu peetotyana.
- 24 She Pilate kuukachani tsa haityitsi heya kui nitrakunishi etyu tu heme ganashiyani naitrakunishi, tsitsi kushitanu chaamawaishityi tsi hanowishi dyika yani, tyanatani: Towa kuitonimishi ga-matsi dyika tsatsi shika-pinaimishra. No he truwatsitawa. Shrue sai hano tyipeyutana, tania: Ga-matsi ai dyu nutrashi e shra-iatratyaimishi dyika dyu. Shrue Barabas hau si tyaiwatyi, etyu Jesus kushayani hau tyikuya, shukuchatsi si nu nietotyana-tsaomasatyishi niya.

- 27 Shrue dapopo ga-sentaru Jesus aiwatyami-gaya hake tyiyutsee, e ai shriena chashrana gowatsikumishi
- 28 sai sentaru. E tyiwakunityutawa, e kukani utyushityi
- 29 tyiwakuna. She gayaanaty niya ushityatsutsi chuwa-wamitrana, shrue ga-nushika ai si dyu taashityatsutsa; e ishitowa kiwa tseshi shrumikawaya kamashityi taaape; e ai yani si nu chaashitotrume tyumayanikuiyana, tania: Gowa tsi, Horiyu ga-raishi! E tyishuputsityia, e ishitowa kiwa tseshi kayaawatya, e ga-
- 30 nushika dyu tyiupaitsana. E shrue kumayanikuiyanaty, utyushityi tyutyutawa, shrue ga-wakuni si tyiwakuna; shrue yuku tyiyutsee, shukuchatsi si nu utotyani niya.
- 32 Hawe si tseemuni, Cyrene-me hatrutsai tiyainawa, Simon E-tya; towa shukuchatsi aikkuiyani taauitrana.
- 33 She Golgotha ai tsaniatyishra (Towa mani tseshi
- 34 niya nushigaini ta) hau tseetyupi, wino e kawitsitrani gayatsi taashikatana; she etyu shikutani tsatsi nushikatyunu. Shrue shukuchatsi si nu tsatotyanaty, ga-wakuni chayachana, shrue tyayainaani. Emi heya prophet tseshi e-katsanishi e naitrakunishi niya:
- Kayachana sa-wakuni, e dinya nu sa-wakuni towaya kayainaani.
- ³⁶ E ai si nu kaataya tyiyukai, E ga-nushika dinya ye
- ³⁷ tsi shityia tsaupinaimetyishi ai tyityishityuime tyidyatrani, TOWA JESUS HORIYU GA-RAISHI TSA. Shrue dyue kuchayawanu ai shriena dyu shukuchatsi si nu taatotyana, ishike shrumikawaya si nu, e ishika ishuya si nu.
- 39 E ai shra tsekkuiyanishi tyiumayanikuiyana, chayanushikai-wutsutsita e tania: Tsityumi-katrutya pupushanishi e chami saiku si naatrashrunishi chaitragu! Tsi ma ima Iusi ga-mutyi kutanu, shukuchatsi dyika
- 41 hawe si nu utya! Emi taa tsika chayani yani tsaaputyishi e tsidyatranikusana e tsaya tsaaputyishi tyiumayanikuiyana tyana: Mika gayatragusu, etyu tsatsi noyu itye naitragukunu. Tsi ma ima Israel ga-rai tsanu, shukuchatsi dyika hawe si nu piitya, shrue niuhima-

- 43 tawana-sutrusa. Wa Iusi dyika tyiuhima, shru piitragu, tsi tsitsipushra; she kanata, Hinome Iusi ga-mutyi suta.
- 44 Shrue tsika kuchawayanutyu shukuchatsi si nu tsaatotyanyatishi ai shriena, emi taa tsika sutsime taniaputyu.
- 45 Shrue shichisu ura dyika si yuku mayuka ura dyika
- 46 hema sai ai shra hatsi dyu tamishityitsi, E haiyitsi mayuka ura dyika Jesus tsishatsi tyusheetsa, tyanatasu: Eli, Eli, lama sabachthani. Towa tsityarapatyitrani tsa:
- 47 Sa-Iusi, Sa-Iusi, Tsekoma hinome tu tyuittra? E hautsi ai tseechanishetyishi towa kakanaty tyana; Towa hatrutsai Elias kuppeotsita. E tu haikamiku tseechanishi ishike tyumitsa e utsishrukaimi tyita, shrue kawashitanishi niya tyiutsishrukaii, shrue ishitowa drutrutyai si dyu e tyitra, shrue hake dyu tyiuttyi,
- 49 ushikaty niya. E mika tyana: Tu pitra. Hanye niukachana tsi Elias hawe tsunyetyu e nitragutyiuma. E Jesus tsika na tsishatsi kusheetsani, gatsatsi sai dyu tsaka. She mu, tsityumi-katrutya ai si nu kouametsishi suna si nu shratyitya, dinyami drutrutya si nu hau nu nukamishuku tsaatsinishi; e hatsi chuwalkutsa, e yaoni peetatya; e ai-ityaitsimi chaatana; e naoya tseepatyishi tsityumishi hano ga-tsinishi si dyu tyeeptyini, e Jesus si dyu tsipatyini si yuku ai-ityaitsimi si dyu tyeemu, shrue tsityumishi tsaashityitra hake tyeeku, e naoya tse dyika ye hawe chuwyatyeimitrana.
- 54 E katsi-wa-katsi sentaru dyika yani tseshi, e ai haupa tseemishi Jesus tsiyukaiityishi, hatsi kuwukutsani kuukachanaty, e sai tsi towa e-kaetranishi, mame ma ima chaaputsa, tyana: Kaimatsi towa Iusi
- 55 ga-mutyi ta. E naoya kuiyawitra tiye si tyiyukaiyi, emi Galilee si Jesus dyika hamashu tyekkuiyishi e tyuikashana. E tyiwataa Magadara-me Mary, e James e Joses gaa-naia Mary, e Zebedee ga-iatratyaimishi ganaia ai tye.
- 57 Shrue shapuka ni kaetra ni, riku-tsa hatrutsai hawe tsutyu, Arimathea-me Joseph emi E-tya, tsika emi
- 58 noyu Jesus tyisomeshita. Wa Pilate dyika ye tsutyu,

- shrue Jesus ga-tsini chuwitaa. She Pilate chuwaya
- 59 tsini aapi. Shrue Joseph tsini kayaawi, natsi chananatsishi niya shruni dyu tyipunaii. Shrue noyu natsi ai-ityaitsimi yaoni dyika kaoshitotsanishra ai gaya tyicha, shrue ai-ityaitsimi tsiana dyika tsichu yaoni hau si tyimakatawa, shrue ai si yuku tsutyu. She Magadara-me Mary e ishika Mary ai-ityaitsimishra ai yani si tyaa.
- 61 Shrue ai na nu tsaashityi emi eyu ai haku utyitani ai na nu tsaashityi, chayani yani tsaaputyishi e Parasai haño Pilate dyika hau tyeeku, tyana: Huchani, eetrusa we tsyawitutyita kanatanishi, tu na tsiianishi,
- 63 Chami sai kaetrani tsika na si nipatyi-si. Emi heya chuwaya ai-ityaitsimi bashruuni menashru chami sai ai yuku tsaashityi, tsi shru tsi gaisomeshitanishi gapushu ni hawe tsekkuiyu, shrue ai yuku tsichawanaty. She hano niyana-kusa hushitoni si dyika si dyu tsiipatyu, emi heya tsaya dyika si chai tsiwippishi mame mina yuku
- 65 sutsime n'taku. Pilate e-tayitsakuiya: Kowawashityu kutrashi; tyekkuma hatsumaku kutrusatya bashru pitrana. She tyeekuma, shrue ai-ityaitsimi bashru tyitrana, yaoni chawyaushikame e kowaashityu ai si taakuiyana.
- 28 She uanatrani tsaashityi kuinaottani, Domiku ishike tsaashityi gaishipitratyani, Magadara-me Mary e ishika Mary ai-ityaitsimi tyuukachanyetyi hawe
- 2 tyeeyu. E mu, mame hatsi chuwalkutsa, she Iusi ga-upeseyi kowatyuma si nu tsutyu, shrue hawe tsutsi yaoni tsiana yuku tyimakatawa, shrue ai si dyu
- 3 chukuiya. Kowawi butruwaishityi ma tye, e ga-wakuni
- 4 hawe me shamutyi; e chaaputsanaty kowawashityu tu tyayaitunutsita, shrue kushitonishi me e-tayatra.
- 5 E Iusi ga-upeseyi kuitseshi tyiipeyuta tyaatsakuiya: Bami chuputsanu. Si-utoni Jesus shiyaipatyu, shukuchatsi si nu tsaatotyanyatishi. Wa tsatsi tui gakuu,
- 6 she si dyu tsiipatyu emi e-katsanishi. Hawe, pu-
- 7 kachanatyu hatyi tsiikaityishra. Shrue haikamiku tyeema puwapenutyu gaisomeshitanishi si dyu tsiipa-

- tyunishi. E Mu, tui yani kutruwa-tsuku, Galilee ye. Ai
 8 niukachana-kutrusa. Mu, shrawappe. She tu haika-
 miku ai-ityaitsimi dyika si yuku tyeeyu, kuputsanishra-
 9 tyu e tsiuishityiani. Shrue tyuumitsa, gaisomeshita-
 nishi dyika ye towa mani ayaikuumittyi. She gaiso-
 meshitanishi gowapenyetyi tyutsi, Mu, Jesus taawatayi
 10 tyanatasu, Gowa tsi! Shrue hau tyeeyu e kashityi si
 tyityatyu e tyuumashitanityu. Shrue Jesus e-taatsa-
 kuiya: Barni chuuputsanu. Nake, puwapenyetyu sa-
 tyumutyaimishi Galilee ye nu n'tyeekukusa. Shrue ai
 niukachana-shikumasa.
- 11 She hake tseeyatani, mu, mika kowawashityu
 tsaashityitra hau tseetyupi chayani yani tsaaputyishi
 12 tyiwapenatyia sai tsi kui kaetranishi. Shrue chayani
 yani tsheshi e tsaya tsaaputyishi haupa kaiwatyametyi, e
 ai shra katsiatyi, sentaru naoya sawaka tyaiwakuitta,
 13 tyayitsakuiya: N'trana-kutrusa, gapushu ni gaiso-
 meshitanishi hawe tsekkuishi, shrue tsichawanatyishi,
 14 sutyepaiityi. E tsi towa dapopo kakanu, niukashitai-
 tyia-sutrusa, e emi heya tsatsi tsityishityi-nutrusa-
 15 kutrusa ye e-nitrana-sutrusa. She sawaka chaukkui-
 yawa; e emi e tsayayanikuiyanatyishi e-tyitrana. E
 towa anatani Horiyu dyika ye sai shra tyiupetani, mina
 wai hema.
- 16 Shrue katsi ishike tsitra ga-umatsityaimishi Galilee
 ye nu tyeeku, kotyu tshesha ai Jesus taiwapenittyishra.
 17 She kuukachanatyi tyuumashitana, etyu hatsue tsa
 18 tyiwahimatya. Shrue Jesus hau tsutyu e tayitsakuiya:
 Kaunamatsi dyika e gaishibishra dyika dyu sai itye
 19 hinome shikaapi. Emi heya tyekkuma, sai hanowishi
 kaisomeshityia payatra, Naishityia e Amutyi e Kuuki-
 muni-Maiani E-gashi dyika ye baptisma niyatyityia-
 20 kutrusa. Sai tsi shrayayanikuiyanishi ayukaii nyeyiso-
 meshityia-kutrusa. E Mu, sai heme tsaashityi gaishibi-
 shra kuinaottanishi hema sayiwatyimusu.